



# Wantok



Namba 1889 Wan Wik Oktoba 28 - Novemba 3, 2010

Niuspepa Bilong Yumi Ol PNG Stret! K1 tasol

**PNG mas wok hat long stretim helt sistem...**

**Polis Fos laikim helpim**  
...namba bilong ol opisa i daunbilo tru



pes 9

Pes 12 na 15

# Korapsen long kisim moa skul fi sabsidi

Veronica Hatutasi i raitim

**KORAPSEN** i kamap long enrolmen data ripot bilong ol skul we sampela skul etministresen i givim bikpela namba long mak bilong ol sumatin long skul bilong ol long kisim moa skul sabsidi mani.

Dispela i kamap long wangepa risets pepa o wok stadi pepa we Nesenel Risets Institut (NRI) i bin wokim long 20 praimer skul long Lae, Morobe provins long 2007.

NRI i bin lonsim dispela ripot aste, we Dokta Arnold Kukari, em wangepa risetsa, na tim bilong em i bin karim wok painimaut watpo ol

skul long Lae Distrik i bin gat moa mak bilong ol sumatin long Gret 1 inap long 6, ovarim 100 pesen mak i go long 216.7 pesen. Na long wokim ol rekomendesen o ripot bilong helpim ol wok long kamapim gut nesenel skul sabsidi (ASC) long nesenel level na tu, kamapim gut wok long bungim ol data o ripot, sekim, menesmen, komyunikesen we edukesen sekta i ken yusim long distrik na provinsel level.

Risets i bin mekim wok stadi long ol 20 skul long Lae Distrik long 2007 we i gat 33,012 sumatin long en na painimaut olsem asua long enrolmen data ripot i bikpela tumas na i no stret bikos long ol dispela asua.

- Planti trensfa tumas i kam long ol narapela skul we skul etministresen i no putim long stretpela ripot eria na taim em ripot i go long ASC, em i no stret;

- Dabel ripoting we ol i no rausim nem bilong ol sumatin long skul rejista taim ol i trensfa i go aut bikos olsem sampela het tisa i tok, sampela sumatin i save go bek taim ol i no painim spes long narapela skul;

- Ghost o giaman nem we inteviu wantaim ol het tisa i soim olsem ol sampela skul long Lae i rejistaim nem bilong sampela sumatin i lusim skul pinis bikos ol i laik kisim moa skul fi sabsidi mani. Dispela em bikpela eria we i wokim na mak bilong ol

skul enrolmen bilong Gret 1-6 long 2007 ASC i bin abrusim stret mak.

- Ol narapela as em long enrolmen o sampela sumatin i lusim skul na ol i go bek na ripot, tasol ol i kaunim ol wantaim ol dispela i skruim skul long hap, ol het tisa i givim bikpela enrolmen namba bikos gen, bikpela mak i min olsem ol bai kisim moa skul sabsidi mani na ol tisa na het tisa i nogat gutpela save long o watpo ol i mas mekim ol stretpela data ripot.

Dokta Kukari i tok long stretim ol dispela asua we i ken bagarapim ol gutpela wok go het edukesen sekta i laik kamapim insait long rifom bilong em, Edukesen Dipatmen i mas karimaut ol woksop bilong ol Stendet Olpisa, ol Elementeri Skul Kodineta, ol het tisa, ol tisa, ol Distrik Edukesen Edministreta, ol Provinsel Edukesen Edvaisa na Provinsel Edukesne Plena long bungim, skelim na wokim ripot long ol data ol i bungim long olgeta edukesen indiketa.

Edukesen Sekreteri, Dokta Joseph Pagelio, taim em i tok amamas long risets na ripot bilong NRI, i tok dipatmen bai bihainim ol samting i stap long ripot long sekim, kamapim ol senis na helpim ol long kamapim gut ol wok insait long rifom sistem taim ol i muv i go het.

"Long kamapim gut Autkam Beis Edukesen (OBE), monitaim ol wok i bikpela samting we bai tokim yumi sapos yumi mekim sampela wok go het," Dokta Pagelio i tok.



WOKIM SAMTING STRET: ol dispela skul sumating bilong Ted Diro Praimer skul Nesenel Kapital Distrik i sapatim tok long ol skul etministresen i mas givim ol trupela ripot. *Poto: Veronica hatutasi*

## Teksim Fevret Sta blo yu!

Lukim EMTV displa Sunde long 6:30pm nait. Teksim nem lo sta yu laikim i go lo namba 1699 na bai yu go insait lo laki dro we yu inap winim kes moni na fri kredit!

### Digicel stars



Digicel tems na kondisen istap insait



## OCEAN BLUE TUNA

*Gutpela abus tru na i no dia tumas!*





# Sampela rot long daunim korapsen long skul enrolmen

# K8 milion long stretim hap bilong Hailans Haiwe

Veronica Hatutasi i raitim

**BIHAINIM ol ripot i stap long wok risets sevei we Nesenel Risets Institut (NRI) i karimaut na autim olsem sampela wok korapsen i kamap long ol sumatin enrolmen bilong 20-pela skul long Lae, Morobe provins, Dokta Arnold Kukari i kamap wantaim ol dispela rot long daunim ol asua.**

Bikpela samting em, ol rekomendesen o ripot long daunim ol asua em ol edukenes atoriti long nesenel, provinsel na distrik level i mas go hetim; Holim Nesenel Skul Sensus (NSC) long namba tu kwata bilong skul yia, na i no long namba wan hap, o wokim long tupela taim insait long wanpela yia long kisim stretpela kaunim mak; Ol Stendet Opisa, Elementeri Skul Kodineta na Distrik Edvaisa i mas sekim gut tru na tok oraitim lista i gat enrolmen bilong ol sumatin long ol distrik bipo ol i givim i go long Provinsel Edukesen Divisen na Edukesen Dipatmen;

Givim mekim save long ol skul we ol i givim ol giaman (Ghost) nem long enrolmen rejista lista bilong ol. Tasol ol Stendet Opisa na Elementeri Skul Kodineta i mas monitaim gut enrolmen bilong ol sumatin long ol wan wan skul long distrik;

Provinsel edukenes Dipatmen i go hetim wok long kisim na sekim gut ol enrolmen data ripot na ol narapela samting long edukenes long wanwan mun o kwatali o ol narapela gutpela rot long bungim data na menesmen system;

Edukesen Dipatmen i sanapim na sapatim wantaim mani Provinsel Edukesen Menesmen na Infomesen Sistem (PEMIS);

Long Edukesen Dipatmen i karimaut ol woksop bilong ol Stendet Opisa, Elementeri Skul Kodineta, ol Het Tisa, ol tisa, Distrik Edukesen Edministreta na Provinsel Edukesen Plena long bungim ol data ripot, glasim na skelim na ripotim ol data ripot long olgeta edukenes indiketa.

Long sait bilong surukim ASC i go long namba tu kwata bilong skul yia, Edukesen Minista, Dokta Joseph Pagelio i tok ol bai lukluk long en bikos ol i save makim Mas olsem taim bilong wokim skul sensus na salim ripot i go long Edukesen opis long helpim ol i redim namba tu hap bilong skul sabsidi mani.

Long daunim pasin korapsen long skul enrolmen na ol samting we dispela i go wantaim, bikmeri bilong Divain Wod Yunivesiti (DWU), Dokta Cecilia Nembou, i askim strong Dokta Pagelio long painim sampela mani na sindaun long Skul Edministresen na Menesmen level kos we DWU na Yunivesiti bilong Goroka i wok long ranim.

Wanpela bikman bilong Yunaitet Nesens sistem long Pot Mosbi opis bilong ol i bin givim aut tupela tingting bilong em long traim helpim daunim asua i no kamap.

Namba wan em long kompensetim o givim luksave long ol skul i mekim samting i stret na, givim skul fi long mak bilong

ol projek ol skul i gat long en.

Dokta Pagelio i bin tok nesenel sensus na ripot long wan wan mun i wok long kamap, tasol rot we ol i wok long katim ol skul fi long ol wan wan skul long wankain "criteria" o mak em ol bai glasim bikos sampela skul i stap longwe na ol i save tromoim bikpela mani long kisim ol skul fi na metiriel.

Long wankain taim, Dokta Pagelio i bin autim tok amamas long narapela ripot i gat ol "Bibliografi"we NRI i bin lonsim.

Bibliografi i gat lista long ol risos metiriel long Edukesen sekta we bai helpim gut ol risets lain, ol edukenes opisa, ol tisa na ol yunivesiti sumatin long mekim ol wok bilong ol.

Dokta Pagelio i bin wokim singaut tu long statim bek Skul Edukesen Jenel we long planti yia i bin save ron na helpim gut ol edukenes, ol skul na ol narapela lain i gat wok long edukenes eria.

Paul Zuvani i raitim

GAVMAN long liklik taim bai givim K8 milion long Dipatmen bilong Woks long stretim hap bilong Hailans Haiwe we bagarap i stap long Simbu Provins.

Dispela mani em i hop long givim long Saplimentari Baset bilong em.

Long wanpela pas em bekim pas bilong Praim Minista, Sif Seketari Manasupe Zurenuoc, i tok em i wanbel long ol toktok olsem dispela bagarap tru tru i stap na i laikim mani mak bilong K8 milion.

Olgeta wok painim na mani mak bilong kamapim dispela wok em opis bilong Deputi Praim Minista

na Minista bilong Woks Don Polye na Dipatmen em i mekim.

Mista Zurenuoc i tok em i amamas long kain wok em Minista wantaim Seketari bilong em Joel Luma i mekim.

"Amamas na tok tenkyu i mas go long Minista Polye long kisim tingting na kamapim dispela wok.

"Tasol long bihainim rot bilong givim ol tok orait mi askim sapos wanpela independen grup i go na mekim wok painim long givim witnes na tok stret olsem kain hevi i stap na i laikim kain mani mak olsem," Zurenuoc i tok long pas bilong em.

# Agiru laik bringim bek lo na oda long provins

Paul Zuvani i raitim

LO na oda long Sauten Hailans Provins i bruk daun olgeta na sampela samting i mas kamap bilong bringim oda long provins.

Na wantaim kamap bilong PNG Likuifaid Nuturel Ges (LNG) projek planti gutpela samting bai kamap.

Tasol namel long dispela planti ol nogut samting bai kamap tu na oslem provins i

mas redi long lukim dispela ol senis i kamap.

Gavana bilong Sauten Hailans Anderson Agiru i mekim dispela tok long taim em i kamap olsem riviuing opisa long taim bilong go aut bilong ol nupela polis opisa long Bomana, ausait long Mosbi long las wik Fraide.

Bikos Nesenel Gavman i nogat inap mani Sauten Hailans Provinsel Gavman i yusim K200,000 long kisim



GIVIM SAPOT: Agiru wantaim eskot bilong Polis Komisina Gari Baki i riviuing ol gredueting opisa long Bomana Polis Kolis. Poto: NICKY BERNARD.

ol manmeri long provins na sponsaim ol long kamap ol polis opisa.

Dispela i namba wan hap tasol Agiru i tok em givim pinis narapela K200,000 na kisim narapela grup gen na trenim ol.

"Wok bilong mi nau em bilong kamapim na strongim gen Sauten Hailans Provins we i bruk daun olgeta long wok bilong lo na oda.

"Olgeta 9-pela memba bilong Palamen i wanbel long mekim dispela disisen long kisim ol manmeri long

provins na sponsaim ol long dispela polis progrem.

"Na mipela i amamas long mekim dispela disisen long wanem provins bilong mipela i baragap olgeta.

Em i tok Polis Fos i gat 4,800 polis opisa husat i lukautim olsem 6 milion manmeri.

Taim Fos i tilim namba bilong ol opisa namel long 6 milion manmeri em bai stap olsem wanpela polis opisa i lukautim olsem 1,250 manmeri.

"Dispela i bikpela namba

na i givim bikpela wok long opisa na i stap aninit long mak em Yunaitet Nesens i laikim long em.

"Yunaitet Nesens i laikim wanpela polisman i mas lukautim 480 manmeri, i no olsem 1,250 long PNG," Mista Agiru i tok.

Em i tokim tu ol gredueting polis opisa olsem ol i gat wok long mekim.

"Yupela i gat bikpela wok long lukautim lo na oda na yupela i mas redi long kari-maut dispela wok.

"PNG LNG projek bai

kamap na bai bringim planti ol gutpela samting.

"Tasol insait long dispela bai gat planti salens i kam wantaim na yupela olsem ol wasman bilong lo na oda i mas redi long bungim dispela ol salens," Agiru i tok.

Olgeta Memba bilong Sauten Hailans arere long James Marape, Memba bilong Tari Pori, stap long lukim dispela greduesen.

Stap tu em Gavana bilong Enga Provins Peter Ipatas.

Bihain long gavman bilong em i sponsaim ol manmeri long provins bilong em bai Enga Provinsel Gavman.

## OXFORD, TOK PISIN INGLIS DIKSENERI

Katim, na pulimapim oda form daunbilong na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

## ORDER FORM

TITLE	ISBN	PRICE per COPY	QTY	SUBTOTAL
PNG Tok Pisin English Dictionary	9780195551129	K38.50		
Recommended retail price correct at the time of printing and is subject to change without notice.				TOTAL K
				PLUS FREIGHT K
				GRAND TOTAL K

\*Freight cost for each book:  
K5.00 across PNG, K10.00 elsewhere  
K3.50 rest of Pacific Is, K11.00 rest of the world

Options for Payment  
1) Direct deposit into Bank Account (details below)  
2) Mail Order to World Publishing Company Ltd, PO Box 1882, SOERABAYA, INDIA  
3) Call into the office: Office 42, Section 58 Alibon Road, Waigani City, MTD.

Account Name: World Publishing Company Ltd  
Account Number: 100 000 5380  
Bank: Bank of South Pacific Ltd  
Branch: Commercial Centre  
Branch Code: 8951  
Swift Code: BOSPPGPM

FAX BACK TO: (675) 325 2579

If you are ordering more than one copy please contact us for a quote  
Phone: (675) 325 2560  
Fax: (675) 325 2579  
Email: world@wantok.com.pg

Name (print): \_\_\_\_\_ Phone: \_\_\_\_\_  
Address (print): \_\_\_\_\_  
City: \_\_\_\_\_  
Country: \_\_\_\_\_  
Email: \_\_\_\_\_ Signature: \_\_\_\_\_

# 'Yumi no kisim skul long Bogenvil birua yet'

Scott Waide i raitim

GIDEON Sioba i save olsem bai gat bikpela pait i kam yet.

Em i save olsem sapos em i no opim maus na tokaut strong long kirapim awenes insait long komyuniti, ol pipel bilong em long Astrolabe Bay eria long Madang bai lukim hevi long bihain taim we busgraun na solwara bilong ol bai bagarap.

Long nainpela mun i go pinis, Gideon i kamap wanpela biknem memba bilong wanpela grup asples manmeri husat i wok agensim Ramu NiCo, kampani bilong Saina gavman husat i wok long sanapim Ramu Nikel Main long Madang. Dispela kempen i lukim Gideon na planti ol arapela wanlain bilong em i kamap ol strongpela ektivis o mausman husat i no laikim tru Ramu NiCo i tromoi moa long wan handret milion tan pipia bilong main insait long 40 krismas i go insait long Astrolabe Bay bilong Madang.

"Mi redi long lusim olgeta samting bilong mi long sevim ples bilong mipela," Gideon i tok. "Ol pikinini bilong mipela i nogat moa bihain taim."

Ramu NiCo i tok nogat.

Long ol pablik rilesen kempen bilong em insait long PNG midia, em i wok traim tok klia na strongim tingting bilong ol pipel olsem Dip Si Telings Plesmen (DSTP) olsem em i wanpela gutpela samting, na i seif.

Dispela kros i kamap wanpela wan yia



**TINGIM PIKININI:** Gavman i no kisim skul long Bogenvil yet, Terry Kunning (lephan) i tok. Em na Gideon Sioba i redi long lusim olgeta samting long banisim busgraun na bihain taim bilong ol pikinini bilong ol.

pait long kot we wanpela kot injangsen i bin sanap 6 mun olgeta inap tripela plentif i rausim kot bilong ol, wanpela wik pastaim long em i kirapim bikpela kot bilong en.

Gideon, wankain olsem ol arapela, i gat gutpela as long wari long bihain taim bilong em na ol lain pipel bilong em.

Strepela tingting na tok stia bilong ol tum-buna bilong em i tokim em olsem doti pipia wara i kam long main bai kilim dai ol kambang insait long ol rip, na ronim ol pis long ol ples we i isi moa long ol asples manmeri long pulim pis. Em i no save long wanem kain marasin i stap insait long ol dispela pipia bilong main.

Long tupela ripot, ol saintis bilong Skotis Institut bilong Marin Saiens, na Mineral Polisi Institute long Australia tu i bin autim

belwari bilong ol long bikpela bagarap i ken kamap long solwara laip na pipel i stap insait long Bay eria.

Ol lokol komyuniti husat i sapatim dispela pait agensim kampani i laik yusim DSTP i no wari long wok bilong Ramu NiCo tasol. Ol i wari tu olsem sapos kot i tok orait long Ramu NiCo, narapela kampani bilong Australia, Marengo, husat i lukautim Yandera main long ol maunten i stap not is long Ramu Nikel main, bai silipim wanpela telings disposal paipain we bai kapsait i go insait long Astrolabe Bay tu.

"Ol arapela lain pipel i wok lukim olsem dispela em i wanpela kempen agensim Ramu NiCo, na agensim divelopmen," wanpela asples bilong Bay i tok. "Em i moa long dispela. Dispela em i laip bilong mipela.

Watpo bai yumi gat tupela bikpela main i tromoi pipia na marasin i go insait long wanpela solwara tasol."

Maski ol i traim long tokim ol asples komyuniti olsem ol i mas wanbel long DSTP, i gat bikpela lain manmeri tu husat i no wanbel wantaim PNG Gavman husat i wok pasim ai na iau long ol belwari na krai bilong ol.

Terry Kunning, bilong Mindere ples i stap hapsait long Basamuk Bay rifaineri. Pipia bilong main bai kapsait i go insait stret long solwara bilong em.

Em i no wanpela saintis, tasol i em i save olsem kala bilong solwara bai senis, na namba bilong ol pis bai go daun.

"Taim mipela i kirapim toktok long ol hevi na birua i ken kamap, ol pipel i stat long tingting moa long en," em i tok. "Olgeta dispela samting i mas stap bilong gutpela long ol pikinini mipela bai lusim i stap long bihain taim."

Terry, husat i wok 25 yia olsem wanpela gavman foresta long Sauth Bogenvil, i lukim bikpela hevi long busgraun Panguna main i kamapim.

Em i lukim ol pipel bilong Panguna i belhat i go, i go, na bikpela 10-pela krismas woa i bin kamap agensim PNG gavman.

Terry i bilip olsem yumi wok long bihainim wankain rot nau i go long bikpela pait i wok kam klostu.

"Ol skul yumi mas kisim gut long Bogenvil, em yumi no kisim."

## Nupela Telikom PNG Miting Ples intanet kafe i op

James Kila i raitim

OL MANMERI long pablik nau i ken gat sans long toktok na lukim piksa bilong man ol i toktok wantaim insait long nupela kain intanet teknoloji em Telikom PNG i kamapim ol i kolim 'vidio konferensing'

Dispela teknoloji em Telikom PNG i tokaut long en long Mande taim ol i lonsim nupela intanet kefe bilong en long daun taun Mosbi. Dispela kefe em ol i kolim 'Miting Ples'.

Insait long dispela nupela Miting Ples bai Telikom PNG i salim ol narapela intanet teknoloji prodak bilong en olsem ol waiales mobail fon na tu ol narapela nupela prodak we i gutpela long ol kastoma long bringim toktok i go kam namel long ol yet long isi rot.

Ol narapela teknoloji ol i putimaut em em 4G Wimax hukap wantaim

rauta bilong em long haus na i ken yusim waiales na bai i no kos bikpela mani tumas.

Telikom PNG Sif Opereting Ofisa, Taito Tabaleka, i tok olsem taim ol i wok long bringim kamap nupela intanet teknoloji i kam insait long kantri ol i lain lukim olsem ol kastoma i baim ol yunits na usim ol kompyuta bilong ol olsem laptop, na tu yusim intanet kafe na tu ol opis kompyuta bilong ol long ol dispela teknoloji Telikom PNG i salim.

Mista Tabaleka i tok olsem long nau yet wantaim intanet na ol programs ol i gat long en, ol kastoma i no inap long westim mani long baim balus na go longwe long bringim ol toktok, ol i ken stap tasol long ofis na yusim dispela vidio konferensing long givim toktok na ol narapela long hapsait i ken harim ol toktok.

## Parkop wari long senis kamap long ol polis opisa

Paul Zuvani i raitim

GAVANA bilong Nesenel Kapitil Distrik, Powes Parkop, i wari long tokaut i kamap long senis bilong ol polis opisa long Nesenel Kapitil Distrik (NCD).

Em i tok kain senis i ken bagarapim gutpela kamap bilong lo na oda long siti long dispela taim.

Em i tok long taim Polis Komisina Gari Baki i mekim ol senis bihainim atoriti em i gat long em long wan kain taim em i gutpela em i mas toktok wantaim em long ol senis em i laik mekim.

Long wanpela pas em i raitim i go long Mista Parkop i tok bikos dispela ol senis i kamap long distrik bilong em i bin moa gutpela sapos Baki i toktok

wantaim em bipo long em i mekim ol senis.

"Mi rait long tokaut log wari bilong mi long ol senis i kamap long koman bilong polis long NCD.

"Dispela em long rausim bilong Asisten Polis Komisina Awan Sete na Operesen Komanda Andy Bawa na i luk olsem Metropolitan Supritenden Fred Yakasa," Parkop i rait.

Em i tokaut long wanem as em i no sapatim senis long dispela taim:

I NOGAT wanpela opisel tok-save i kam long yu long dispela ol senis sapos ol i mas kamap;

KOMAN aninit long Sete na Bawa i bin gutpela long wanem dispela i daunim namba bilong ol hevi i kamap;

LONG taim ol wok painim i go

insait long trabel bilong biknem raskol man, William Kapis, i wok long kamap, em i no gutpela ol i mas senisim dispela ol opisa i mekim wok painim;

MI no amamas long makim bilong Inspekta Ben Turi long go pas long CID Divisen bilong NCD long wanem em dispela opisa husat i lusim i go aut tupela meri husat i bin kisim K5 milion long Dipatmen bilong Tresari na Fainens na Dipatmen bilong Plening na Monitaring.

"Em i tingting bilong mi olsem Koman aninit long nau NCD Sif Supritenden Yakasa na Operesen Komanda Bawa long ol i mas stap yet bikos planti ol gutpela senis long wok bilong lo na oda i wok long kamap," Parkop i rait.



**KAMAPIM CHAMPION BLO YU!**





# Woksop mekim klia hevi bilong ol meri long ileksen

Veronica Hatutasi i raitim

**WANPELA** woksop long jenda na ileksen i kamap long tupela wik long Mosbi na pinis tumora i givim moa save long ol lain i sindaun long woksop olsem, meri na man i mas wok wantaim long olgeta level bilong laip, wok na sosaiti na bai gat balens long sait bilong wokim ol disisen long famili, komyuniti na kantri.

Wantaim het tok, "Jenda na ileksen", woksop i bin stat long las wik we namba wan grup i gat 25 pipel i kam long Ilektoel Komisin long Mosbi, ol Etmintrestiv Menesa long ol provins na sampela niuslain i bin sindaun long en. Laspela grup bai pinism kos tumora.

Cate Thompson na Gordon Marshall bilong Ilektoel Komisin bilong Australia (AEC) na Regina Lunge wantaim



**JENDA NA ILEKSEN WOKSOP:** Sampela ol lain long woksop i wokim mok o giaman ileksen na kaunim. *Poto: Veronica Hatutasi*

Alwyn Jimmy bilong PNG Ilektoel Komisin (PNGEC) i go pas long dispela woksop.

Woksop i bin bihainim "Bridge" Modul i bin lukluk long 6-pela ki o bikpela luksave eria, we hevi i

stap long en na rot long stretim.

Long stat bilong woksop, i bin gat kliapela luksave long wanem em jenda (gender) na wanem em seks (sex). Olsem na jenda i sut long ol samting i narakain long

man na meri yumi lainim long sosel sait olsem long kalsa na i ken senis. Jenda i sut long pawa, wok na rait taim seks em yumi ken lukim olsem man i narakain long meri na mama i karim yumi olsem.

Long sait bilong ileksen long PNG, ol woksop grup i bin lukim ol samting we i save kamapim banis long ol meri long sanap olsem kendidet, go long ples bilong rejistaim nem na go long vot na long wankain taim tu, painim rot long helpim daunim.

Sampela ol banis em nogat inap mani long karimaut kempein na go long ol longwe ples long maunten, solwara na ol ples longwe, nogat pati (politikel) sapot, tumbuna pasin we tingting i pas olsem ol meri i no inap, wok long famili olsem ol mama na sampela taim, ol meri i save tok baksait taim ol wanlain bilong ol i laik sanap long lidasip posisen.

Sampela ol rot we ol grup i bin lukim long stretim ol banis em, long moa politikel pati i mas sapotim ol meri kendidet na ol bai gat mani na trenspot long go aut wokim kempein bilong ol, ol ileksen opisa i go aut long ol viles na mekim isi long olgeta lain inap long putim nem lon g komon rol i rijista na wokim edukesen awenes long ol rait na gutpela samting bai kamap sapos ol meri i kisim ol lidasip posisen i mas kamap long ol viles na komyuniti bipo long taim bilong ileksen stret.

Woksop i bin soim tu olsem long wol na i stat yet long yia 2006, moa meri i wok long go insait long Palamen we mak i stap nau long 17 pe sen.

Na mak i bikpela moa long ol kantri i bin gat ol woa na hevi na i wok long kamap orait olsem long Rwanda, Saut Afrika, Mosambik, Angola, Is Timor na ol narapela moa.

# Bus paia bringim hevi long Namasearo haus lain

Sape Metta i raitim

MOA long sikspela mun i go pinis nau we i lukim planti ol eria long

Hailans rijen i kisim taim long wanem em i taim bilong drai, na paia i wok kirap klostu klostu.

Isten Hailans em i wanpela long ol provins we i no lukim ren inap sikspela mun olgeta. Planti lain manmeri na

pikinini long ol busples i wok long bungim planti hevi long dispela taim bilong san. Nau yet, yangpela

mama, Moriambo Tony, man bilong em Junia Tony, namba wan pikinini man bilong tupela Jay, husat i gat sikspela krismas, na tupela pikinini meri, Jessie (3-pela krismas) na Fanandi (wan krismas) i nogat haus slip moa long ples Namasearo long rural Unggai distrik long Isten Hailans bihain long buspaia i bin kirap na pinisim haus bilong ol tripela wik i go pinis.

Em i namba tu haus bilong paia insait long wanpela mun tasol.

Polis long Goroka i holim pasim pinis Yarox Newton long stesin long dispela buspaia we i kirap long gaden bilong em na i surik i go antap

na kukim dispela ol haus.

Nay yet, bihain long dispela hevi bilong bus paia, moa long 1,500 famili i kisim taim nau long wanem haus bilong ol i go daun pinis lo paia wantaim olgeta kago samting bilong ol.

Lidaman na LLG presiden bilong Unggai distrik, Benson Koifa, i tokim Wantok Niuspepa olsem dispela em i wanpela bikpela hevi we ol pleslain long dispela hauslain i bungim.

Em i namba wan taim stret long kain hevi i kamap. Long taim bilong tumbuna, i kam inap nau, kain hevi em ol pleslain long dispela eria i no save bungim.

"Bikos em i namba wan taim bilong ol dispela hauslain i karim, olsem lidaman na tu, wanpela pikinini bilong dispela hauslain, mi pilim bikpela pen tru long lukim kain hevi i kamap na bagarapim sindaun bilong mipela," Koifa i tok.

Em i tok long bildim ol haus na kirapim bek Namasearo hauslain, bai kisim samting olsem tenpela krismas long bringim bek olgeta samting na sindaun em bai ken kamap gut olsem bipo.

Koifa i tok nau yet, em i hat long ol manmeri na famili bilong ol long kirapim bek ol haus bilong ol long wanem, bikpela san na drai i mekim na ol samting bilong wokim ol haus i drai nabaut.

Em i tok ol ples lain long Namasearo viles i nidim tru ol helpim, olsem na em i askim memba bilong ol na Provinsel Gavman long lukluk na helpim turangu lain bilong dispela hauslain we i stap long hevi nau.

Koifa i tokim ol manmeri long noken kukim paia nating nating long dispela taim bilong bikpela san.

Em i tok sapos ol manmeri i no nap long harim tok na wokim ol paia nating nating, em ol i ken bringim hevi i go long haus lain komyuniti.

**NOGAT MOA:** Yangpela mama Moriambo Tony na pikinini meri bilong em Fanandi i sindaun sore long famili haus bilong ol we i no moa stap bihain long buspaia i kirap na kukim i go daun. *Poto: Sape Metta.*



**Gat wok lo Hapim, Pullim Ropim o Titim? Em mipela igat ol rite samtin lo yusim!**

- CHAIN BLOCKS HEAVY DUTY 3G & A.B.S. - 1A
- WIRE ROPE GRIPS
- GREEN PIN GRADE 'S' SHACKLES OTHER GRADES AVAILABLE
- EYE BOLTS
- RIGGING SCREWS TO B.S. 4429
- LOAD BINDERS & TRANSPORT FITTINGS
- VERTICAL OR HORIZONTAL STEEL PLATE LIFTING CLAMPS
- WIRE ROPE THIMBLES
- LOAD RESTRAINT EQUIPMENT
- CHAINS - ALL GRADES & TYPES AVAILABLE
- OPEN & CLOSED METALLING SOCKETS
- LEVER HOISTS
- HAND OR POWER OPERATED SHEAVE BLOCKS
- STAINLESS STEEL FITTINGS
- WEBBING OR ROUND SLINGS

**BISHOP BROTHERS**  
*everything for industry...*

EMAIL: sales@bishopbros.com.pg WEBSITE: www.bishopbros.com.pg

# Ol i pulim taitim ol namba gen

**TRU olsem politiks na pasin pamuk em tupela namba wan wok long wol?**

Larim, mipela no inap go insait long dispela askim long wanem dispela tupela samting i no gutpela long paitim tok long ol long pablik. Laka?

Nau Suprim Kot i tok olsem i brukim lo long pasim lekhan bilong memba bilong palamen i go long politikal pati bilong en, bihain long em i vot pinis bilong praim minista, nau mipela i kam bek gen long ples we ol politisen i ken kirapim bek pilai bilong ol long pulim taitim ol memba i go kam long traime rausim gavman na sanapim nupela.

Wanpela askim we Suprim Kot i no bin tok klia gut long en, em: "hamas taim tru insait long 5-pela yia bilong em olsem palamen memba bai em i ken mekim dispela?"

Em i bihainim stret konstitusenal rait na fridom long senisim pati long laik bilong wan wan, na sapos em i stret, hamas traime bai wan wan memba i ken mekim dispela? Na taim memba i mekim dispela pinis, em bai mas bihainim dispela pati em i kalap i go long en inap long taim em i lusim wok memba o nogat? Sapos nogat, watpo na em i noken mekim olsem?

Wanpela hap tok i stap olsem "sanctity of contract", we em i olsem wanpela tok promis namel long tupela lain. Em i wankain tasol long wokbung namel long memba na politikal pati bilong em, taim em i stap memba, laka?

Mipela i gat moa bilip long tingting bilong Peter Donigi, olsem Suprim Kot i mas sanapim gut wanpela ligel faundesen o strongim jasmen bilong em na tok olsem rait bilong palamen long oraitim ol lo i no wanpela bikpela lo we i nogat



salens i ken kamap long en. Tasol em i wanpela rait we i gat rot long lo bilong glasim. Tasol, Mista Donigi i tok olsem ating Suprim Kot i laik lukluk sekim wan wan kes yet, na i no laik givim wanpela bikpela tok stia olsem. Mipela yet, mipela i ting olsem i mas i gat wanpela bikpela tingting o lo i stap bai i stap ples klia long wanem sait tru lo i bihainim.

Long dispela taim we gavman i wok long pilai tumas wantaim laip bilong pipel, olsem ol senis em i mekim long Envaironmen Ekt 2000, na ol bipo senis long Lidasip Koud, ol kot i mas kamaut klia na mekim strongpela toktok makim pipel, na givim sampela lo stia long ol politisen long stretpela we aninit long lo long mekim wok gavman na wok bilong palamen.

Konstitusen o Mama Lo long yumi i askim ol jas "judicial ingenuity" o wok bilong stretpela tingting na luksave na traime strongim lo luksave bilong Papua Niugini. Tasol i kam inap nau, i nogat piksa olsem ol kot bilong yumi long Papua Niugini i wok traime strongim dispela askim na givim bekim.

Mipela i nidim wanpela toktok i kam long ol Kot long luksave bilong lo long Papua Niugini i stap insait long nesanel konstitusen taim yumi ridim ol sabstentiv provisin bilong konstitusen wantaim ol Nesanel Gol na Dairektiv Prinsipel. Ol kot i

mas kamaut strong na tok klia olsem ol politisen i no inap long rausim strong bilong ol astingting o lo bilong Konstitusen o mama lo o traime long rausim ol konstitusenal institusen we i mas stap long holim strong bilip na nem bilong mama lo.

Nau Suprim Kot i seksekim kantri liklik, na nau olgeta politisen i wok resis long kisim namba wan wok long kantri, na tu, kisim ki long benk bilong kantri, em nesanel treseri.

Sapos yu skelim politiks long PNG i kam daun long astingting bilong em stret, bai yu painim ol dispela tok: 'pawa' na 'mani' bilong ol bikpela mangi, na 'luksave' bilong ol wanlain bilong ol.

Yu bai ting olsem ol lain i go insait long politiks i mekim long givim sevis long pipel, tasol long dispela kantri, em i nogat. Yumi traime askim sampela ol memba bilong yumi long wan wan ilektoret insait long Nesanel Kapitel, long wanem hap tru ol i yusim dispela K10 milian ol i kisim olgeta yia? Yupela bungim olgeta dispela mani we?

Nau ol memba bilong palamen i wok long soim ol tru tru kala bilong ol gen, bai gat planti mani, pamuk meri na bia i kapsait long laik long wan wan hotel i stap long Pot Mosbi. Tru tumas, planti long dispela mani bai kam long nesanel tresari we gavman bai traime holim strong ol memba bilong em bikos oposisen i rauni stap na traime stilim wan wan ol memba long bungim ol namba bilong ol bai ol i ken salensim Sir Michael na ol liklik mangi bilong em.

Bipo yet, mipela i luk olsem ol memba bai sanap wantaim gavman long pablik, tasol taim ol i stap ol yet, ol bai salim ol lain bilong ol i go aut long sekim husat i wok bung wantaim husat, na wanem namba mak bilong ol memba

i laik senisim gavman.

Em nau ol gavman memba i save long ol nupela namba bung, na sapos namba i go pulap long oposisen sait, long las minit, gavman memba bai senisim sait na go wantaim oposisen.

Dispela kain senis na baim hos na givim nating mani em Ogenik Lo long Intekriti bilong Politikal Patis i bin pasim na daunim olgeta.

Nau ol provisin long Ogenik Lo em kot i tok i nogat as long en, ol bois i raun raun stap na pilai gen. Long ol yet, ol i ting olsem dispela pasin em i gutpela tasol.

Husat manmeri i ting olsem ol politisen i noken mekim dispela kain pasin, bai krangi tru long holim strong dispela tingting.

Politisen em i politisen, na dispela i min olsem husat manmeri i gat bilip long wanpela politisen, em i longlong manmeri moa long dispela politisen em i gat bilip long en. Yu bai no inap luksave long politisen husat i stap gut olsem ol arapela manmeri. Sapos em i mekim dispela, em bai lusim sia bilong em long ileksen.

Politisen em i wanpela pablik parasait o tewel husat i no save hatwok. Politisen i no save wok long kisim pe, long wanem em i sindaun long hatwok bilong ol manmeri bilong kantri, na winmani em i save kisim long takis ol pipel yet i save baim.

Na moa yet, politisen em i wanpela man husat i ken tromoi mani na i no save wari long wanem hap narapela hap kina bai kam long en. Ol dispela lain i save pinisim mani bilong pablik olsem ol laus bilong dok i save pinisim blut bilong em. Ol em ol rabis lain tru.

Em nau yumi bai lukim gen. Sapos Somare i raus long wanpela vot i nogat bilip, bai yumi mas

makim wanpela arapela risaikol Praim Minista.

Tru tumas, yumi nogat wanpela politisen we yumi ken tok em i 'nupela blut'.

Planti long ol em ol i lapun na skin i slek na ol i nogat moa strong, na nau, ol i stap long palamen olsem ol i stap long wanpela haus bilong ol lapun tasol, o haus sik bilong ol siklain i nogat moa strong.

Yumi mas gat lo bilong pasim ol lain i go bek long palamen, bihain long ol i stap memba tupela taim pinis, bai yumi ken lukim sampela nupela lain i go insait long palamen wantaim sampela nupela tingting na kirapim divleopmen long gras-ruts level.

Nau yet, planti long ol memba bilong palamen i save stap sindaun long Pot Mosbi o Australia, na ol i nogat save tru long wanem samting i kamap long ol ples long olgeta hap kona bilong Papua Niugini.

Em i taim nau long yumi mas lukluk long ol samting ol manmeri i mas gat sapos ol i laik sanap olsem kendidet bilong wan wan ilektoret. Ol lain memba husat i no save stap sindaun long distrik bilong ol stret, i noken gat sans long sanap long makim dispela distrik o konstituensi.

Dispela bai pulim olgeta memba bilong yumi i go bek long distrik bilong ol. Nau yet, bai yumi no inap lukim pes bilong ol, inap i kamap long taim bilong ileksen gen, we ol bai brum i go bek long ol distrik na ples bilong promotim wanpela kago kalt tingting.

Yumi mas mekim sampela bikpela senis long palamentari sistem bilong yumi, na yumi mas mekim nau.

**EM NAU!**

**WANTOK**

**Niuspepa bilong yumi ol PNG Stret!**

**Kam gut yak!**

**Em stret!**

**Tin tumas!**

SPOTS

WANTOK

NIUSPEPA BILONG YUMI OL PNG STRET

TOYOTA



# The Horse Trading begins all over again

**IS THERE any truth in the suggestion that politics and prostitution are both the oldest professions in the world?**

Well, we will not go into that in this column to maintain an element of integrity because the subjects or subject might not be a proper subject for a public discussion.

Now that the Supreme Court has determined that it is unconstitutional to bind a member of parliament to his political party even after he had already exercised his choice when he voted for the Prime Minister, we are back to base where the politicians can resume their game of 'head-hunting' to overthrow an existing government to form a new one. One question that the Supreme Court did not answer is: "how often is the member of parliament allowed by the constitution to exercise that choice in his 5 years as a parliamentarian?"

Is it a constitutional right or freedom to switch party from time to time, and if so, how many times is a member allowed to exercise that right or freedom? And once that member has exercised that right or freedom of choice, is he not bound by that choice for the duration of his term as a member of parliament and if not, why not?

Ever heard of the word, "sanctity of contract"? Is it not unlike the case of the contractual or a quasi-contractual relationship between a member and his political party that would bind him for the duration of his term in parliament?

We prefer the view expressed by Peter Donigi that the Supreme Court ought to have laid a solid legal foundation for its judgement by declaring in effect that the parliament's right to pass laws is not absolute but a qualified right sub-



ject to certain legal preconditions. However, Mr Donigi points out, maybe the Supreme Court wishes to deal with each case on its own facts rather than laying down a general principle. But what we require is a certain degree of certainty in the law, particularly when it comes to the issue of which way is the law leaning.

It does not help at all if we are to deal with all legal issues on a piece-meal basis without any guidelines as to which way we are heading.

Particularly at this stage of development where the State is playing havoc with the lives of the people, for instance, the Amendment to the Environment Act 2000, and the previous amendments to the Leadership Code, the Courts must come out strongly and exert a position of strength and direction; strength in the sense that it must come out of the closet and assert the prominence of the judicial authority of the people vested in the Courts and in the like manner, provide some judicial direction to the politicians as to which is the proper legal way to conduct the business of parliament.

The Constitution calls for judges to exercise "judicial ingenuity" and work towards the development of Papua New Guinean jurisprudence and particularly the underlying law, but to date there is no evidence that our Courts have picked up the

constitutional challenge.

What we require from the Courts is a statement of the Papua New Guinean philosophy of law as embodied in the national constitution particularly when reading the substantive provisions of the constitution against the back drop of the National Goals and Directive Principles. The Courts must come out strongly and assert that the politician cannot start to water down the structure of the Constitution or attempt to do away with certain constitutional institutions which are fundamental to the integrity of the constitution as a whole.

In any event, now that the Supreme Court has disturbed the hornet's nest, they are all out again vying for the top job in the country, and thereby get access to the national treasury. When one reduces politics in PNG to its core element, it all boils down to the two words, 'power' and 'money' for the big boys, and 'perks' for their associates.

One would think that people enter politics to 'serve' people, but it seems not the case in this country. Let us take some of our members for the various electorates in the National Capital and ask what they have done with the K10 million that they collect annually? Where have they pooled all that money?

Now that our members of parliament are out there showing their true colours again, there will be a lot of money, prostitutes and booze flowing freely from hotel to hotel in and around Port Moresby. As is usually the case, most of the money will be coming out of the national treasury where the government will be trying to hold its membership together given that the

Opposition is already out lurking in the background poaching candidates to swell its numbers to topple Sir Michael and his supporting parliamentarians.

From past experience, we know that members would openly side with the governing side, but behind the scene, they would be sending their scouts to find out who was meeting whom and what the likely number of candidates seeking to topple the government were. Done that way, the government members were kept abreast with the new developments so that if it appeared that the majority were with the Opposition then in the last minute, the government member would switch sides and vote with the opposition. This is the kind of horse-trading and money laundering that was stopped by the Organic Law on Integrity of Political Parties.

However, now that the relevant provisions of the Organic Law have been struck out as unconstitutional, the boys are out and about and at it again. And most of all, it is business as usual.

Anybody who thinks that politicians should not conduct themselves the way they do, is totally out of context in maintaining such a position. A politician is a politician which means anybody who trusts a politician is a bigger fool than the politician he or she trusts. One cannot expect a politician to act like a normal person otherwise he will cease to become a politician, hence he would lose his seat when he returns to the polls. Basically, a politician is a public parasite who does not know what hard work is all about. A politician does not have to earn a living because he lives off the hard work done by the common man and woman and from the pro-

ceeds he collects as taxes from people and businesses alike. And worst of all, a politician is the only one who can spend money without wondering where the next batch of kina will come from. These guys live off public funds like body lice or fleas. They are a despicable lot.

So here we go again. We have to slot in another recycled Prime Minister if the present one is thrown out in a successful Motion of No Confidence.

What else can we expect, when we have very few politicians whom we can label, 'new blood'. The bulk of them are tired old souls who appear to treat parliament as a retirement home or a sanitarium for the sick and the feeble.

We should pass a law to stop people returning to parliament after two full terms so that we can allow more people and new people to enter parliament to bring new ideas and stimulate development at the grassroots level. Right now, most of our members of parliament are living in either Port Moresby or Australia and they have no concept of what is happening in our villages throughout Papua New Guinea.

What we need to do now is have another look at the preconditions for standing as a candidate for a particular electorate. Those members who are not resident in their home districts should not be qualified to stand for that district or constituency.

This would force our members to return to their districts. Right now they are nowhere to be seen until it is election time when they will all be pouring back into the districts and villages promoting a cargo cult mentality. Let us undertake some major reforms in the whole parliamentary system.



# WANTOK

Niuspepa bilong yumi ol PNG

## Stret!





## Oi Lae Laiones i wokim fanresing long helpim ol kensa siklain



STAIL LONG PINK: Oi Lae Laiones long fan resing nait bilong ol. *Poto: bemobile midia*

**KENSA** yunit long Angau Memoriel Haus sik long Lae insait long Morobe provins i kisim helpim long wanpela fan resing koporet dina kaikai ol memba bilong Laiones Klab long Lae i bin kamapim.

Oi Laiones Klab memba em ol meri husat ol man bilong ol em ol memba bilong Lae Laions Klab. Ol i save mekim gupela wok long helpim ol narapela manmeri na pikinini i sik, i sot long samting o i laikim helpim. Long dispela fanresing ol meri Laiones Klab memba i holim,

mobail kampani, em be-mobail, i bin wanpela long ol i givim K5,000 mani sapot long helpim dispela meri grup i karimaut wok long sapotim kensa yunit long Angau Haus sik.

Taim em i prisenim sekmani long ol Laiones Klab meri husat i bin putim ol pinkpela klos long fan resing taim, Advetaising Menesa bilong bemobail em Judith Elijah i bin tok bemobail i gat laik long givim helpim long ol eria we pipel bilong dispela kantri bai kisim gupela samting long en. "Helt i bikpela samting

olsem tasol edukesen, na bemobail i amamas long givim sapot tude. Dispela i bihainim tu visen o driman bilong gavman long kamapim gut helt bilong pipel long dispela kantri," Mis Elijah i tok.

Olgeta meri i bin putim pinkpela klos long dispela taim na ol i bin go kisim sekmani.

Long wankain taim, bemobail bai skruim yet Pink Pati long Lamana Hotel long Mosbi long ol Fonde nait. Long dispela nait tu, bemobail bai givim aut ol 20 K50 topkad.

## PNG niusmeri i go long tripela wik trening long Amerika

WANPELA yangpela meri jenelis o ripota long PNG i stap nau long tripela wik lidasip trening program bilong ol nius manmeri long Amerika (United States of America).

Nellie Setepano em dispela meri jenelis i wok wantaim Post Courier niuspepa long Pot Mosbi i bin lusim kantri long las wik bilong stap insait long Edward Murrow Program bilong ol jenelis i bin stat long Oktoba 25 na bai pinis long Novemba 12,2010.

Mis Setepano i stap long dispela trening long Amerika wantaim ol nius manmeri bilong ol narapela kantri long wol olsem Is Timor, Fiji, Indonesia, Malesia, Nu Silan, Pipels Ripablik bilong Saina, Filipin, Singapo, Saut Korea, Taiwan, Tailen, Vanuatu na Vietnam.

Rot we ol i kisim ol jenelis long trening kos em ol jenelis yet long ol wan wan kantri i putim aplikesen bilong ol long ol



**NELLIE SETEPANO:** Nellie i kisim ol pepa samting long wanpela opisa bilong embasi bilong Amerika long Mosbi bilong helpim em long wokabaut i go long Amerika. *Poto: US Embasi*

embasi opis bilong Amerika long ol kantri ol i stap long ol na ol i glasim na skelim na kisim wanpela long ol wan wan kantri. Aninit long dispela program, ol i save kisim ol jenelis bilong ol kantri long wol long go insait long program long glasim wei ol nius manmeri i mekim wok long Amerika. Program em i wok bung namel long praivet na pablik

patnasip we Stet Dipatmen, Aspen Institut na 10-pela top jenelisisim skul long Amerika. Program i glasim ol rait na risponsibiliti o wok bilong fri pres insait long demokretik sosaiti, lukim wei ol i wok, ol stendet, politikel straksa bilong Amerika na stap insait long ol profesenel developmen semina na intenesenel symposium o

bung i soim aut ol salens long wok jenelisisim.

Bihain long ol i soim ol jenelis long wok ripoting long Foren Afeas long Amerika na tu, soim ol long straksa na wok insait lonmg US Foren Polisi eria long Wasington DC, ol Murrow jenelis i bin go long ol woksop bilong ol profesenel jenelis long Yunivesiti bilong Minesota long Mineapolis, lukim sivil na politikel laip long Pensakola long Florida na pinisim program long Nu York siti we ol bai lukluk long midia na ileksen, raun lukim ol midia ogenaisesen long Nu York siti bipo ol i go bek long ol wan wan kantri bilong ol.

Embasi bilong Amerika long PNG i amamas long makim Ms Setepano long dispela projek long go long dispela trening program na skruim save bilong em long wok bilong em bai gupela long kontribuit long developmen bilong kantri.



# Pablik Notis

## SUPARENUESEN KONTRIBUSEN BILONG OL KESUAL WOKMANMERI

Sapos yu wanpela kesual o ansileri staf o wokmanmeri i holim dispela wok moa long tripela mun na yu stap long peirol moa long tripela mun, aninit long Lo, yu mas givim kontribusen i go long Suparenuesen bilong bihain taim bilong yu.

Lo bilong Suparenuesen i karamapim olgeta wok bisnis we i gat moa long 15 wokmanmeri, na olgeta wokmanmeri i mas kontribuit long wanpela Suparenuesen Fan bihain long ol i wok tripela mun na i go het, maski ol i kesual, o ansilari wokman. Dispela em wanpela luksave mak tasol.

Sapos yu wok moa long tripela mun olsem wanpela pemanen, kesual o ansilari wokmanmeri, tasol i no wok kontribut long seving bilong yu, yu mas kwiktaim toksave long Human Risos o Peirol opisa bilong yu long stat kontribut i go long Nambawan Super Limited. (Tingim olsem long olgeta wan kina yu kontribut, kampani i mas givim K1.40 long makim yu). Olsem, ol kontribusen; em bisnis/kampani bai peim 8.4% na ol wokmanmeri bai peim 6%. Mipela i laik tokim ol bisnis/kampani husat i gat aninit long 15-pela wokmanmeri long kontribut i kam long Nambawan Super Limited. Sapos yu (bisnis/kampani) i no bihainim dispela Suparenuesen Lo, bai i gat penalti na yu ken kamap long kot.

Tok orait i kam long

**Leon Buskens**  
Menesing Dairekta

Long kisim moa toksave, yu ken ringim ol dispela lain:

<b>HEAD QUARTERS</b> Ground Floor, Era Rumana P.O. Box 483, Port Moresby National Capital District Ph: 309 5311 Fax: 321 4406 Email: nsgom@nambawansuper.com.pg	<b>MOMASE REGION - LAE</b> Ground Floor, Vale Rumana PO Box 1289, Lae, Morobe Province Ph: 472 2272 Fax: 472 4636 Email: nslae@nambawansuper.com.pg	<b>HIGHLANDS REGION - MT HAGEN</b> Suite 1, Ground Floor, Capina Building, PO Box 1574, Mt Hagen, Western Highlands Province Ph: 542 1182 Fax: 542 1186 Email: nshagan@nambawansuper.com.pg	<b>NEW GUINEA ISLANDS REGION - KOKOPO</b> Sec 6 Lot 19, Togigira Street, Kokopo, PO Box 806, Kokopo, East New Britain Province Ph: 982 8900 Fax: 982 8901 Email: nslabai@nambawansuper.com.pg	<b>Nambawan Super Goroka</b> Suite 32, Level 1, Gouna Centre, Elizabeth Street P O Box 757, Goroka, Eastern Highlands Province Ph: 532 1224 Fax: 532 1918 Email: nslgorokai@nambawansuper.com.pg	<b>Nambawan Super Alotau</b> Ground Level, Chescorp Building, Sec 21 Lot 10 P O Box 727, Alotau, Milne Bay Province Ph: 641 0671 Fax: 641 0587 Email: nslalotau@nambawansuper.com.pg	<b>Nambawan Super Buka</b> Suite 2, Level 1, Matanhei Building P O Box 19, Buka, Autonomous Region Bougainville Ph: 973 9801 Fax: 973 982 Email: nslbuka@nambawansuper.com.pg	<b>Nambawan Super Madang</b> Suite 14, Level 1, Beckslea Plaza, P O Box 142, Madang Madang Province Ph: 422 0244 Fax: 422 0255 Email: nslmadang@nambawansuper.com.pg	<b>Nambawan Super Kavieng</b> Ground Floor, Durima Building P O Box 567, Kavieng New Ireland Province Ph: 984 2611 Fax: 984 2612 Email: nslkavieng@nambawansuper.com.pg	<b>Nambawan Super Kimbe</b> Level 1, Hamamas Trading Building, P O Box 593, Kimbe West New Britain Ph: 983 5450 Fax: 983 5101 Email: nslkimbe@nambawansuper.com.pg
--	---	---	---	---	---	--	---	--	---



# PNG mas wok hat long stretim helt sistem

## ...Sainim MOA long wok bung wantaim Kwinslen helt dipatmen

**Veronica Hatutasi i raitim**

**PNG BAI no inapim ol Milenium Developmen Gols (MDG) kam yia 2015 tasol yumi mas wok hat long stretim sampela samting insait long yumi yet na helt sistem bilong yumi, Helt Sekreteri Dokta Clement Malau i tok.**

Dokta Malau i tok helt sistem long PNG i mas kamapim gut infomesen seksen na tu, eria bilong gutpela gavanens.

Tu, sekta (Helt) i mas strongim helt sistem bilong em na moa yet, long wok wantaim ol Sif Eksekutiv Opisa (CEO) long provinsel na distrik level bai lukim olsem wok i ron gut long kisim sevis i go long pipel insait long ol komyuniti na ples.

Rot we helt bilong ol mama na ol pikinini i ron na literesi level o pipel insait long kantri i save long rit na

rait em ol mak we ol kantri i skelim developmen o ol wok go het bilong kantri.

Tasol piksa long PNG na moa yet long ol mama i dai taim ol i karim bebi na ol pikinini i gat namel long 0 na 5 yia i dai, i no gutpela long Pasifik rijen. Na planti taim yumi harim long redio, ritim long ol niuspepa na lukim long telivisen long ol Milenium Developmen Gols (MDG) we PNG na samting olsem 180 kantri i bin sainim long kamapim gut ol 8-pela MDG poin insait long 15-pela yia bai pinis long 2015.

"Mi ken tok sampela wok go het i kamap olsem demogrefik helt sevei i soim, tasol yumi mas kamapim gut na strongim infomesen sistem bilong yumi long kamapim ol stretpela ripot bilong wanem, sampela ripot i no wankain," Dokta Malau i tok.

Em i tok HIV/AIDS em i wanpela long ol MDG tasol sampela wok go het i kamap long sait bilong Volunteri Kaunseling na Testing (VCT) taim moa pipel i go kisim ol tes.

Tasol em i tok salens i stap long sait bilong sik TB we sik i wok long go bikpela na sampela marasin i no wok gut long wanem, ol siklain i no bihainim ol taim stret long kisim marasin. Tu, sik olsem kolera i kamap bikpela long kantri we i singautim yumi long lainim na mekim ol besik o liklik samting olsem wasim han bihain long yusim toilet na tu, bipo long kaikai o redim kaikai, long stap helti.

Narapela tupela samting em, ol laipstail sik i wok long go bikpela long PNG na tu, ol birua long kar we i wok long kilim dai planti yangpela save lain na ol narapela pipel bilong yumi, Dokta Malau i tok.

Long wankain taim, PNG helt sekta bai wok patna wantaim Kwinslen Nesanel Helt Dipatmen long Australia bilong kamapim gut wok long kisim helt sevis i go long ol manmeri logn dispela kantri, na sapotim klinikal edukesen long Kwinslen.

Dokta Malau i bin makim PNG Helt Dipatmen long sainim wanpela agrimen o Memorendum ov Andastending (MOA) wantaim Michael Reid em Dairekta bilong Jenerel Helt long Kwinslen long las wik Fraide long dispela wok bung namel long tupela i ken kamap.

Dispela MOA i karamapim 7-pela eria tupela bai wok insait long ol long kamapim ol samting ol i laikim. Em long tupela long wok bung wantaim bilong kamapim gut wok long kisim helt sevis i go long ol manmeri long dispela kantri, na sapotim klinikal edukesen long

Kwinslen. Ol prairiti eria long wok bung wantaim ol i luksave long ol em, oditing, gavanens, bisnis plening, wok na monitaim, kwaliti na sefti, i mas gat inap woklain long ol boda eria olsem Totes Streit Ailan bodamak, karimaut klinikal edukesen, trening, fanding na ol arapela moa.

Dokta Malau i bin tokaut tu olsem PNG i kamap olsem wanpela eksekutiv long Wol Helt Ogenaisesen Eksekutiv Bot long makim Westen Pasifik rijen we i gat 28 kantri long en. Australia, Nu Silan, Japan, Saina, Singapo na ol Pasifik kantri i stap long dispela grup.

Helt Minista taim em i tok tenkyu long sapot we PNG i kisim long stap long dispela top wol WHO bot i bilip olsem dispela bai givim sans long PNG kisim gutpela besik helt sevis long olgeta pipel i gat nid long ol dispela sevis.

## Komiti lukluk long PMS

**Veronica Hatutasi i raitim**

WANPELA komiti i lukluk nau long tingting bilong kirapim Pasifik Medikal Senta (PMS) long PNG em wanpela biknem dokta bilong PNG na sif, Dokta Mathias Sapuri i go pas long en, Helt Sekreteri, Dokta Clement Malau, i tok.

Em i tok tu olsem wanpela grup bai kam long Amerika (USA) long bung wantaim gavman na ol bikman long Helt Dipatmen long toktok long PMS.

Maski, planti pipel long PNG na sampela dokta na ol bikman i wok long sait bilong helt i no wanbel long gavman i sanapim PMS bikos dispela bai mekim helt sevis long kantri i bagarap i go moa na tu, em bai sevim ol bikman i gat mani, Helt Minista Sasa Zibe i strong olsem PMS i mas kamap.

Long dispela wik, Dokta Malau i tok plen long sanapim PMS i stap long Visen 2050 Nesanel Helt Plen we Nesanel Eksekutiv Kaunsel (NEC) i tok oraitim pinis, tasol ol i no kamap yet wantaim ol samting i sut long fanding.

"Em i tru olsem PMS i stap long Nesanel Helt Plen 2050, tasol i nogat yet mak long hamas mani bai troimoim long sanapim dispela nupela haus sik, mani bai kam long wanem hap na ol narapela samting moa," Dokta Malau i tok.

Aninit long dispela nupela Helt Plen 2010-2050, Helt Dipatmen bai yusim K14.7 milion long go hetim ol wok i stap insait long en na PMS i wanpela long ol.

## STAP HELTI NA SEIF LONG WOK GUT



**TELIKOMYUNIKESAN** kampani bilong kantri em Telikom PNG i laikim bai ol woklain bilong em i stap helt, i seif na i gat gutpela sindaun na laip long mekim gut wok. Olsem na insait long las tripela wik, ol woklain bilong em long Nesanel Kapitel Distrik i wok long kisim fri banis sut long HINI o sik kus bilong pik (swine Flu).

Telikom PNG i wok bung wantaim WHO long givim ol fri HINI banis sut. Poto i soim PNG Telikom Okupesen Helt na Sefti Welfea opisa, Sista Pauline Buito i givim sut long Eking Manesa bilong Protektiv Sevis, Suat Kurun, taim ol narapela woklain i lukluk i stap. **Poto: Luther Lamang bilong Telikom Midia**

## Jubili i no yunivesiti yet

...Stretim ol wok pas-taim wantaim OHE

OPIS bilong Haia Edukesen (OHE) i laik tok klia gen olsem Jubili Kolis long Gerehu insait long Nesanel Kapitel Distrik i no wanpela yunivesiti na noken paulim pablik na ol papamama long tok olsem em i wanpela yunivesiti.

Dairekta bilong OHE, Dokta William Tagis, i wokim dispela tok klia bihainim ol ripot i bin kamap long niuspepa long stat long dispela mun we i tok Oposisen lida Se Mekere i givim helpim i go long Jubili Yunivesiti long wokim banis raunim skul eria.

"Dispela ripot i paulim trupela taitel bilong skul we Asembli ov God Sios i papa long en, em Institut ov Haia Edukesen projek we i no wanpela yunivesiti yet. Na dispela ripot long kolim institusen yunivesit bai paulim planti ol papamama long kantri. Midia ripot i bin kwestenim tu disisen bilong Nesanel Eksekutiv Kaunsel (NEC) Disisen Namba 95/2009 gavman bilong PNG i bin mekim we i as tasol long kirapim Jubili olsem wanpela kolis na i no olsem wanpela yunivesiti," Dokta Tagis i tok.

Dokta Tagis i tok OHE i mas givim tok orait pastaim long wanem grup, ogenaisesen o sios grup i laik kirapim yunivesiti skul, olsem i stap aninit long OHE Ekt o lo bilong 1983 we i bungim wantaim ol lo long 1995 na 2009.

Dokta Tagis i toke m i luksave long helpim we Se Mekere i givim, tasol OHE i laik etvaisim sios (AOG) long noken kolim Jubili olsem wanpela yunivesiti.

Em i tok i moabeta long Jubili kolis i toktok wantaim OHE long bihainim stretpela rot pastaim bipo em i kamap olsem wanpela yunivesiti.



# Australia kisim namba wan santu

Veronica Hatutasi i raitim

**LONG** las wik Sande, ol Kato-lik pipel na tu, olgeta pipel long Australia i bin selebret long namba wan Katolik santu bilong kantri.

Mary MacKillop nau ol bai kolim em, Santu Mary of the Cross MacKillop, i bin kisim blesing bilong Pop Benedict 16 long las wik Sande insait long wanpela bikpela sios seremoni long Vatikan, Rom, wantaim 4-pela narapela Katolik santu manmeri bilong ol narapela kantri.

Seremoni long santuim Santu Mary na narapela 4-pela i bin gat tripela hap na i bin kisim tripela awa. Pastaim em long ritim ol laip stori bilong wan wan long ol, namba tu em long prisenim ol raiting o preia na laspela em long misa lotu long santuim ol.

Moa long 8,000 Katolik Pilgrim bilong Australia i bin wok-abaut i go long Rom na selebretim bikpela de bilong wanpela lain bilong ol i kisim dispela bikpela luksave long sios. Ol biknem Katolik sios lida long Australia olsem Kadinel George Pell, ol Sister i go pas long kongriksen bilong Santu Mary of the Cross MacKillop, Foren Afeas Minista bilong Australia em Kevin Rudd, sampela asples



**NAMBAWAN SANTU BILONG AUSTRALIA:** Santu Mary of the Cross MacKillop we Pop Benedict 16 i bin wokim blesing na givim luksave wantaim 4-pela narapela santu manmeri long wol insait long wanpela bikpela seremoni long Rom.

Aborijini bilong Australia na planti ol narapela moa i bin stap wantaim planti tausen pipel long Sen Peter's Skwea taim Pop Benedict 16 i wokim blesing long santuim wanpela pikinini bilong Australia na ol narapela 4-pela moa.

Long Australia yet, bikpela selebren tru i kamap long ol Katolik pipel na ol narapela lain wankantri bilong dispela santu. Ol Knight of the Sauten Kros i bin go pas long ol selebren i makim anuel selebren long bilip we i karamapim kalsa na

histri bilong Katolik komyuniti long Australia.

Santu Mary of the Cross MacKillop i gutpela piksa long ol tisa we long planti yia, Australia i kisim blesing long gat ol tisa i kisim skul long gutpela pasin bilong em long sait bilong trening na karimaut ol wok long skulim gen ol pikinini Australia.

Maski ol i ris, ol turangu, ol wait o blek skin, Santu Mary of the Cross MacKillop i bin strong long skulim ol yangpela long kisim gutpela save long ol wok akademik na spirituel sait twantaim.

Bikpela samting em bin mekim em long strongim wok long skulim ol Aborjinis turangu pikinini long ol ruel eria long Australia we laip i hat. Na planti ol narapela meri i bin joinim em long wok long kisim skul namel long ol turangu Aborijinis taim em i statim namba wan kongriksen bilong "Sisters of St. Joseph of the Sacred Heart".

Planti salens em bin bungim, tasol preia bilong em i go long Santu Josef na Santu Hat bilong Jisas i bin givim dispela holi meri grasia long karimaut wok long God na sios.

Long yangpela bilong em yet, Mary i bin gat bikpela tingting long givim laip bilong em i go long sevim God na ol turangu. Mama i karim em long Saut Aus-

tralia na em i namba wan long 8-pela pikinini long famili bilong em. Taim famili i bungim hevi, Mary i bin wok long helpim lukautim famili na ol barata susa bilong em.

Em na wanpela pater we em bin wok bung wantaim, Pater Julian Woods, i bin statim kongriksen bilong Sisters of St. Joseph of the Sacred Heart na ol namba wan Katolik skul long Australia.

Insait long wanpela yia tasol, Mary i bin kirapim 40 skul we 120 Sister long kongriksen i helpim long karimaut ol wok. Kongriksen i kisim ol turangu pikinini long ol kain lotu na ol bikman long Katolik Sios i no bin wanbel long dispela.

Katolik Sios i bin odaim em long lusim sios bikos em i no bin wanbel long sampela senis we bisop bilong ol i laik mekim, tasol taim dispela bisop i laik dai, em i rausim dispela oda.

Maski ol kain hevi i bin kamap, Mary na Sister long kongriksen bilong em i wok strong long inapim ol gols we ol i statim oda bilong ol. Olsem na long Sande Oktoba 17, wol i bin luksave long meri we ol lain long Australia i laikim em moa long 100 yia nau. Dispela meri i gat daun pasin tasol em i strong long bilip na wok long sevim God na ol turangu.



## Nau em taim bilong kisim gutpela tingting na save

TUDE i gat planti kain giaman na paul pasim i stap long olgeta hap bilong kantri. Long olgeta kain level bilong lidasip pasin bilong wok hait na paulim samting em wanpela samting i save kilim indai rispek na hop ol pipel i gat long ol lida man na meri.

Em i olsem sik kensa save kilim indai rispek ol pipel i gat long ol lida na daunim gutpela laip, sindaun na ol wok kamap insait long ol ples, komyuniti, taun na kantri bilong yumi.

Pasin giaman na paulim samting em i wanpela bikpela sik we i stap long planti hap insait long busples i go inap long bikpela taun na ol bikpela siti.

Planti man long taim ol i laik kisim wok olsem lida i no save soim tru pasin bilong ol. Ol bai haitim gut ol kain giaman pasin na ol pipel i ting, ating em i gutpela man o meri.

Dispela em i wanpela hevi we yumi i gat tude insait long wok bilong lidasip na kantri bilong yumi. Nau em i taim bilong kisim gutpela tingting na save kam long God papa bilong yumi.

Gutpela tingting na save em i kam long God tasol, na em yet em i as tru bilong olgeta kain gutpela tingting na save.

Proverbs 2:6-God yet save givim gutpela tingting na save.

Proverbs 3:13- Yu yet i ken wok hat long kisim gutpela tingting na save

Proverbs 4:7-Gutpela tingting em i winim olgeta arapela samting na em i antap tru.

Proverbs 11:2-Gutpela tingting em i save kam long man husat i daunim em yet.

Proverbs 13:10-Gutpela tingting save kam long man husat i, laik kisim advais.

Sapos yu laik lidim ol narapela manmari, yu mas larim God i givim yu stia na yu mas bhainim em pastaim long ol narapela manmeri i ken bhainim yu. God i ken bles yu.

# Sen Marys' Peris i tingim Misin Sande

Paulus Tali i raitim

**YUMI** olgeta i mas mekim wok misinari insait long famili, komyuniti na kantri em bikpela toktok i kamap long las wik Sande we i "Misin Sande" long kalenda bilong Katolik Sios.

Long Sen Marys' Katolik Sios peris long Goroka, Isten Hailans, wanpela spesel misa lotu i bin kamap long tingim bikpela wok misin we ol misinari mekim long kisim Tok bilong Bikpela i kam long PNG.

Maski em Sande long 3 kilok apinun na bikpela ragbi pilai presis namel long PNG Kumul na Australia Kangaroo i kamap, planti Kristen i no tingim ol ausait wokabaut nabaut na ol manmeri na pikinini stap lukim piksa long pilai. Tasol ol i tingim spirituel laip bilong ol na kamap long lotu em moa gutpela na ol i kamap long dispela spesel lotu sevis.

Pater Ciro Biondi PIME i autim tok bilong God na tok dispela Sande, Oktoba 24 em i de



**BAPTISMO:** Pater Ciro Biondi PIME i kapsaitim holi wara long givim Sakramen bilong Baptismo long liklik pikinini. Poto: Paulus Tali

bilong sios long tingim Misin Sande na ol evanjelis na misinari bilong ol longwe kantri i kam long PNG na mekim wok bilong sios. Na ol i karim Gut-

nius bilong Bikpela na go long olgeta hap bilong PNG maski maunten, nambis, sanguma i stap. Tasol Tok bilong God i go insait nau we yumi mas tenkyu

long God long en.

Pater i tok yumi ol Kristen bilong tude i mas save long God, tasol na traim long bhainim em.

Em i tok wok misin i bilong yumi olgeta na i no bilong ol misinari bilong ol narapela kantri na oltaim, yumi mas tingim prea long strongim laip bilong ol narapela husat i sot long bilip. Dispela em wanpela long ol wok misin yumi ken mekim Pater i tok.

Long dispela lotu sevis tu, 18-pela pikinini i bin kisim namba wan Santu Komyunio na 16-pela i kisim Baptais. Pater na asisten bilong em, seminarian Anthon Simbai, i bin mekim dispela wok we bai strongim ol Kristen long bilip bilong ol. Wanpela bikman bilong Simbu long ples Dumun insait long Sinasina em John Wausine, i gat 56 krismas i bin kisim Baptismo tu.

## CPP lonsim namba tu hap long program bilong em

**OL SEVENPELA** sios long PNG husat i wok aninit long Sios Patnasip Progrem (CPP) i bin lonsim namba tu hap long program las wik long Goroka.

Dispela 7-Pela sios em long Angliken, Baptis Yunien, Katolik, PNG Evanjelikel Luteran, Salvesen Ami, Seven De Atventis na Yunaitet Sios.

Aninit long CPP program, ol sios i wok wantaim AusAID na ol NGO

patna bilong ol long Australia olsem Atventis Developmen na Rilif Ejensi, Angliken Bot ov Misin Australia, Australian Baptis Wol Eid, Australian Luteran Wol Sevis, Caritas Australia, The Salvesen Ami na Yunaiting sios long Australia.

Rot we ol i bhainim em AusAID i save givim mani i go long ol NGO patna long Australia na taim ol PNG sios i laik mekim ol wok na projek, ol i save go long ol dispela patna

long kisim mani inap long mak stret. Olsem na i mas gat ripot long ol rot we ol i yusim mani long en na nogat wok paul i kamap. Na olgeta lain i amamas olsem ol i yusim mani gut long mekim ol wok, kamapim developmen na helpim ol pipel bilong PNG.

Ol eria we dispela CPP program i fokus long ol em long helt, edukesen, HIV/AIDS, strongim na developim humen risos o ol woklain

long karimaut ol wok na ol samting moa olsem. Bikos ol sios i gat bikpela netwok long ol ruel eria we ol i papa long haf bilong ol helt na edukesen sevis, gavman bilong Australia na PNG i luksave long dispela na long yia 2002, ol bin lonsim CPP program. Progrem ya i helpim tu long inapim Milenium Developmen Gols (MDG) we PNG i sainim ol pepa long inapim kam yia 2015.

Aninit long dispela namba tu hap bilong CPP program, ol sios bai go hetim yet ol program long namba wan hap, tasol ol bai fokus long strongim kodinesen long ol wok, jenda ikwaliti na skruim ol program i go aut moa.

Namba tu hap bilong program bai pinis long 2016 na ol i putim AU\$50 milion manimak long karimaut ol wok, program na projek.



**PNG BIRUA INVESTIGESAN  
KOMISIN I MEKIM NAMBA  
WAN RIPOT LONG BIRUA**

OL investigeta i tok wanpela pailot bilong Australia i no bin gat sans long pundaunim balus bilong en insait long Papua Niugini, we i bin bungim birua na kilim em yet na narapela tripela pipel.

PNG Niusman Liam Fox i ripot tripela sitisen bilong Australia na wanpela Nu Silan i bin dai taim wanpela Cessna jet balus i bin abrusim 'ranwe' long ples balus long Misima Ailan, na i pundaun bagarap na kilim ol pasindia insait long mun Ogas dispela yia. Ol namba wan ripot bilong PNG Aksiden Investigesen Komisnin i tok ol pipel, husat i bin lukim dispela bagarap i tok bikpela ren na win na wara i bin stap long 'ranwe' taim balus i bungim birua.

Sif Eksekutiv Opisa bilong Komisnin, David Inau, i tok pailot bilong Australia i bin flaim balus bilong en i go daun long 450 mita longpela 'ranwe' we em i 11 handret mita olgeta.

"Mipela i skelim kondisen bilong ranwe na ol arapela strongpela win i bin stap, we i bin mekim hat moa long pailot long apim nus bilong balus kwik."

Komisnin i wetim 'bilak bokis' flait rekoda bilong balus long sekim olgeta samting pastaim long ol i tokaut long wanpela 'fainal' ripot.

**OPOSISEN PATI  
BILONG COOK ISLANDS  
I NO AMAMAS LONG  
GAVMAN**

GAVMAN bilong Cook Islands (Kuk Ailans), i kisim planti toktok kros pinis long watpo em i givim 25 nupela trakta i go aut raun long kantri.

Oposisen Kuk Ailans Pati bilong kantri i wok long askim dispela bikos insait long tripela wik, ol pipel bai go vot long jeneral ileksen bilong kantri. Kuk Ailans Pati i tok em i wari long dispela pasin olsem ating em i brukim Ilektral Ekt, olsem ol i bilip, dispela ol trakta bai ol i givim long wan wan ilektoret. Pati Lida Henry Puna, i tok gavman i no givim wanpela toktok long watpo ol i kisim ol trakta i kam long Saina, na tu, watpo ol i givim i go long ol pipel long dispela taim.

"Wanem kain samting we wanpela man o wanpela grup i givim aut em i gris samting aninit long ilektoral ekt bilong yumi, na sapos ol i givim dispela samting bilong tanim tingting bilong husat manmeri i kisim, em i bilong baim vot bilong pipel. Yu save, gavman i wok long toktok long baim ol trakta longpela taim i go pinis. Tasol ol i no tilim, inap long nau, we i klostu long taim bilong ileksen stret."

**AUSTRALIA KANGAROOS I  
MAS WINIM INGLAN LONG  
WIKEN**

INSAIT long ragbi lig nius, Kangaroos fowet, Petero Civoniceva i tok tim bilong en bai bungim wanpela strongpela salens insait long Four Nations pilai dispela wiken em i pilim Ingran bihain long ol i kilim Papua Niugini Kumuls.

Australia i kik statim kempen bilong en wantaim



**Haiwara  
karamapim  
Tailen**

**WANPELA** man Tailen i wokabaut brukim haiwara long wanpela tempol bilong Budisim long Ayutthaya provins long Sande. Tailen i kisim bikpela taim bihain long haiwara i bagarapim ples tupela wik nau. Ol haiwara we i bin kirap long Oktoba 10, i bagarapim sindaun bilong planti milian pipel long kantri. Nau gavman i wok bungim bikpela hevi tru long helpim ol pipel i stap long ol longwe ples.

42-nil long Sidni, taim Nu Silan i winim Ingran 26-10 long Wellington.

Tasol Civoniceva i tok Ingran i mas win long stap insit long resis, olsem na em i tok, em bai wanpela strongpela gem bilong tim bilong en.

"Ol bai pilai strong, bihain long ol i lus long Nu Silan. Ol i bin strong agensim mipela i go inap long fainols las yia, na mipela i bin laki long daunim ol. Nau bai wanpela bikpela salens tru bilong mipela long Sarere nait."

**SAMTING OLSEM 160 PIPEL  
I LUS LONG WANPELA  
VILES BIHAINIM SUNAMI**

OLATORITI insait long Indonesia i tok 23 pipel i dai pinis na moa long 160, ol i wok long painim ol, bihain long wanpela guria na sunami i hamarim lain ailan bilong Mentawai arasait tasol long Sumatra.

Indonesia niusman, Matt Brown, i ripot kam long Jakarta i tok makim bos bilong disasta menesmen ejensi insait long Wes Sumatra long tok olsem guria na sunami i bin kamapim bikpela bagarap long saut hap bilong Mentawai ailan.

20 pipel i dai long saut bilong Pagi Ailan na ol i wok long painim klostu 167 pipel bilong tupela ples.

Ejensi i salim wanpela lain bilong ol i go long sekim ol bagarap na halivim ol savaiva.

15-pela paramilitary polis opisa na wanpela narapela tim bilong Indonesia ami, nau i wok long go long hap long bot.

Long dispela namel taim tu, ol i no save long wan-

pela lain 'sefa' grup bilong Australia, husat i bin stap antap long wanpela bot i no longwe long ol ples guria na sunami i hamarim.

NGO lain, SurfAid, i salim pinis lain bilong ol yet long halivim ol ples manmeri na halivim wantaim painim ol pipel husat i lus.

**JAPAN I TINGTING LONG  
JOINIM TRANS-PASIFIK  
PATNASIP**

AMERIKA i tok welkam long nupela laik bilong Japan long joinim ol 'negosiesen' toktok bung long stap hap bilong wanpela Trans-Pasifik Patnasip.

Wanpela sinia opisa bilong US Stet Dipatmen i tok i gat gutpela na bikpela intares Japan i soim long ol i laik joinim.

Tasol, asisten sekreteri bilong Stet bilong Is Esian na Pasifik Afes, Kurt Campbell, i tok Japan i no mekim wanpela fainol disisen long join yet.

Em i tok tasol dispela intares o laik bilong ol i mas kisim tok orait bilong arapela 'patisipeting kantri'.

Amerika, Australia, Chile, Singapore, Peru, Brunei, Vietnam, na Nu Silan, i bin holim namba 3 raun bilong ol toktok dispela Trans-Pasifik Patnasip.

Na ol i tokaut olsem Malesia bai joinim ol long ol negosiesen.

Bikpela hap bilong dispela miting tu bai bungim ol toktok bilong wanpela rijinal fri tred dil," na long sem taim, Presiden Barack Obama i go pas long Esia Pasifik samit miting we bai go long Hawaii long neks yia.



# Polis Fos laikim helpim

## ...namba bilong ol opisa i daunbilo tru

### Paul Zuvani i raitim

**NAMBA bilong ol polis opisa long lukautim lo na oda na jeneral pablik i sot.**

I nogat inap polis opisa long stap na banisim ol manmeri hariap taim hevi i kamap na Polis Komisina Gari Baki i laik senisim dispela.

Long stat Baki i singautim ol opisa husat i save bodigat long wanwan ol manmeri na oganaisesen long dispela taim long ol i mas go bek long polis fos.

Dispela oda em i givim long Trinde 20 Oktoba, 2010.

Narapela tu hap em long trenim moa polis opisa.

Long dispela hap em i gat bikipela amamas na tok tenkyu long Gavana bilong Sauten Hailans, Anderson Agiru.

### Agiru givim

Agiru i putim K200, 000 long kisim sampela manmeri long Provins bilong em we ol i pinisim 6-pela mun polis trening long Bomana Polis Kolis stat long Epril na pinis long Oktoba las wik.

Em i tok long putim narapela K200, 000 long kisim sampela moa man-

meri na pinisim namba tu hap bilong trenim ol.

Mista Agiru i mekim dispela long daunim hevi bilong lo na oda long Sauten Hailans Provins.

Long toktok bilong em olsem riviu-ing opisa long taim ol treni opisa i go aut em i tok lo na oda i bruk daun long provins bilong em.

Na em i kisim tingting long yusim mani bilong em na trenim moa manmeri bai ol i go bek na strongim lo na oda long provins.

Long dispela as namba wan hap bilong ol manmeri long las wik i pinisim trening bilong ol.

Bihainim Agiru bai Peter Ipatas, Gavana bilong Enga Provins, long em bai putim mani na kisim ol manmeri long Provins bilong em na trenim ol long kamap polis opisa.

Askim i go long ol arapela provins long bihainim na trenim ol manmeri bilong ol long kamap polis opisa.

### Nupela rikrut polisman winim trening

Las wik, Fraide 22 Oktoba, 2010 inap olsem 192 opisa (20 meri) i pinisim polis trening bilong ol long Bomana Polis Kolis.

PNG Likuifaid Niturel Ges Projek i

stap long Sauten Hailans Provins na long taim yet planti ripot bilong hevi long lo na oda i kamap pinis.

Agiru i hop olsem wantaim ol polis opisa em i trenim dispela bai inap daunim sampela hevi i kamap long provins bilong em.

Na long Polis Fos yet Mista Baki i tok aninit long Mama Lo polis fos i kamap bilong lukautim na was long gutpela stap bilong ol sitisen bilong kantri na i no ol wanwan lain manmeri.

"Mipela i gat 4,800 polis opisa husat i lukautim olsem 6 milion manmeri.

"Taim mipela i tilim namba bilong ol opisa namel long 6 milion manmeri em bai stap olsem wanpela polis opisa i lukautim olsem 1,250 manmeri.

"Dispela i bikipela namba na i givim bikipela wok long opisa na i stap aninit long mak em Yunaitet Nesens i laikim long em.

"Yunaitet Nesens i laikim wanpela polisman i mas lukautim 480 manmeri, i no olsem 1,250 long PNG.

"Tasol long lukluk gut 1,000 opisa i stap long edministresen na dispela i lusim 3,800 tasol i stap long mekim wok.


"Hap bilong dispela namba em ol i

stap long 45 krismas na i redi long pinis long polis fos.

"Katim dispela yu gat 1,900 opisa tasol i stap bilong mekim ektiv wok long polis fos.

"Kain mak i nogot moa taim wanpela i lukim narapela hap i go long lukautim praivet o pablik sekta na i no lukautim jeneral komyuniti olsem em i mas mekim."

LAIKIM SAPOT: Polis Komisina Gari Baki.



## Buy 4WDs - trucks - buses - sedans from Japan

Tel: +81-52-219-9024 / Fax: +81-52-219-9025

### 1000 used vehicles from Japan:

[www.JapaneseVehicles.com](http://www.JapaneseVehicles.com)

GO

#### Some example:

PRICES IN PNG KINA, SHIPPING COST AND TAXES NOT INCLUDED.



SN 117273  
TOYOTA LANDCRUISER 1993  
4.2ltr diesel, AT, green,  
162,000km



SN 119417  
TOYOTA VISTA 2000  
1.8ltr petrol, AT, silver,  
51,000km



SN 118480  
TOYOTA CAMRY GRACIA 1997  
2.5ltr petrol, AT, silver,  
83,000km



SN 118403  
NISSAN CEFIRO 1997  
2.0ltr petrol, AT, silver,  
114,000km



SN 119430  
TOYOTA CAMRY 1997  
1.8ltr petrol, AT,  
WhitePearl/grey, 69,000km



SN 119213  
MITSUBISHI CANTER 1997  
2.0ltr petrol, MT, white,  
109,000km



SN 118650  
HONDA CR-V 1996  
2.0ltr petrol, AT, silver,  
91,000km



SN 119467  
MITSUBISHI PAJERO 1994  
2.8ltr diesel, AT, d-blue/silver,  
91,000km, 3 doors



SN 118883  
TOYOTA HILUX SURF 1993  
2.4ltr diesel, AT, wine  
red/grey, 64,000km



SN 119191  
MITSUBISHI ROSA 1998  
5.2ltr diesel, AT, white,  
110,000km

### Wei Bilong Baim Kar Ikam Long Japan

1. Makim kar bilong yu.  
Sekim web-sait bilong mipela o askim wanpela sels edvaisa bilong mipela



2. Askim tasol long wanpela fri kwotesin.  
Ringim mipela long telefon, fax o e-mail.



3. Pinisim peimen.  
Peim long US Dola igo long benk akaunt bilong mipela.



4. Bai mipela salim kar bilong yu long sip.  
Gutpela rot long salim long sip na save kam hariap tru.



5. Yu kisim kar bilong yu.  
Peim takis, rejistarim kar ya na yu redi long draivim.



Contact us and leave your telephone number, we will call you back. From 8:00 to 23:00, PNG time, ask for Roger / Juan.

TEL +81-52-219-9024 / FAX +81-52-219-9025

WEB [www.JapaneseVehicles.com](http://www.JapaneseVehicles.com) / EMAIL [sales@JapaneseVehicles.com](mailto:sales@JapaneseVehicles.com)

## SPARE PARTS SERVICE

Genuine Spare Parts from Japan

EMAIL [parts@JapaneseVehicles.com](mailto:parts@JapaneseVehicles.com) / TEL +81-52-219-9358





Jada 2010!

# Stap wantaim Kumuls ...painim rot na putim trai

**YUMI ken tok olsem PNG Kumuls i bin kamapim wanpela strongpela na hatpela gem tru agensim Australia Kangaroos long las wiken, tasol dispela strongpela gem i no kamapim wanpela poin liklik.**

Ol karim bikpela kiau stret. PNG givim hatpela takol na strong bilong ol tu i no lus o daun inap long fultaim bikos ol i save olsem em wanpela bikpela gem tru yumi olgeta pipel bilong PNG i stap wantaim ol na lukluk i stap.

Planti saveman bilong ragbi i daunim stail bilong ol na tu i tok kosa i no eksperiens tumas long sait bilong sansem Australia. Tasol wanpela gutpela samting yumi lukim tu em olsem tripela trai bilong Australia bin kamap long sait ol kik we PNG Kumul bin abrusim na mekim isi long Australia long putim trai. Sapos dispela tripela isi trai no bin kamap, ating skoa



bilong Kangaroo inap stap tasol long 20 na 30.

Wanpela bikpela samting tasol em PNG Kumuls i no soim wanpela gem plen liklik. Kain plen olsem bal bai ron go olsem wanem na husat bai inap kisim bal na ron na brukim banis liklik go insait long hap sait bilong Kangaroo. Nogat wanpela gem plen bin kamap klia liklik.

Ating sapos gem plen bin sanap long sait bilong putim trai, ating sampela trai bai inap kamap. Tasol nogat ya. Ol difen na takol tasol. Olsem na ol kik bilong Kangaroo kam go abrusim ol boi Kumuls na trai wok long kamap isi long dispela.

Sapos bal bin ron long winga liklik na traim larim winga ranim bal go liklik,

ating ol inap surukim Kangaroo go bek liklik long banis bilong ol. Tasol nogat ya. Bal wok long ron long namel tasol na olgeta taim Kumul kisim bal em ol ron stret long bamim ol Kangaroo tasol.

Sampela taim Kumul kikim bal taim namba tri takol o namba wan takol na ol lusim planti bal long dispela taim. Olsem na rekot i soim olsem Kangaroo i holim bal moa long PNG Kumuls.

Kumuls tu i lusim planti bal nating nating na Kangaroo wok long kisim bal na kisim planti sans long putim trai.

Nogat bel pen long lus bilong Kumul bikos yumi save olsem yumi pilaim ol bikpela na strongpela ragbi tim insait long wol.

Tasol bikpela samting em gem plen bilong traim putim trai i no kamap klia liklik na ol boi givim planti bal go long ol Kangaroo.

Sapos Kumul ken lukluk moa long gem plen bilong kamapim trai bai orait. Maski ol skoa, yumi tu mas skoa

em bai kirapim bel na skin long putim moa trai. Sapos yumi laik difen difen tasol na takol takol tasol em taim bai sot na yumi bai karim kiau tasol olsem i go.

Senisim plen liklik nau long wanem hap ol boi Kumul ken putim trai long en egensim Nu Silan na Ingran long neks wik na narapela wik.

PNG gat spit na bun bilong daunim ol traipela man go daun olsem na yusim dispela strong long daunim ol go daun long takol na yusim spit long tekov wantaim bal na putim trai.

Mipela laik singaut taim trai i kamap. Sapos PNG ken putim trai, mi bilip ol dispela lokol fama bilong PNG we ol waitman kolim pinis bai pretim ol dispela bikpela ragbi nem kantri.

Olsem na ol boi Kumul, mipela staim wantaim yupela, putim trai. Painim gep na putim trai. Mipela stap wantaim yupela.

## WANTOK KOMENTRI

### Bogenvil krais i givim skul, gavman i kisim o nogat?

SAPOS nesenel gavman i no luksave yet long skul Francis Ona na Bogenvil Krais i bin givim yumi, bai yumi lukim i kamap gen.

Namba wan bikpela skul Bogenvil i bin givim yumi, em long strong bilong ol pipel.

Planti ol memba husat i stap nau long gavman i no bin stap taim Bogenvil krais i bin kamap.

Planti long ol minista tude, i no save long belkros na belwari ol asples bilong Panguna na Bogenvil i bin pilim, na hevi ol i bin karim taim PNG gavman i bin bihainim laik bilong maining kampani.

Taim Ona na ol lain paitman bilong em i bin rausim olgeta lek bilong gavman na kampani long main, em nau pait i bruk i go bikpela.

Nau, yumi lukim ol papagraun bilong Madang i wok long mekim wankain toktok Ona i bin mekim long gavman, tasol gavman i no harim.

Pasin bilong bagarapim ol bikpela risos projek long kisim luksave bilong gavman i no wanpela nupela samting.

Na nau, sapos ol pipel bilong Madang i no lukim wanpela gutpela bekim bilong gavman long ol belwari bilong ol, ating bai yumi lukim wankain hevi i kamap.

I tru planti long kantri i save lukim ol Madang olsem ol lain bilong stap isi.

Tasol sapos yu banisim man na pasim olgeta rot bilong em long kisim luksave long sindaun bilong ol pikinini bilong em long bihain taim, bai em i pait.

Wanpela kot i ron i go pinis, na gavman i soim strong bilong em wantaim kain kain tok pret na giaman.

Dispela wanpela kot i pinis, tasol i gat narapela i kamap gen.

Na maski gavman na kampani i amamas long ol i ken go het na pinisim projek, i gat bikpela wari tru i wok long groa, na planti moa asples manmeri i wok long belhat long pasin gavman i wok mekim.

Long dispela as tasol, gavman i mas tingting gut.

Gideon Sioba na Terry Kunnung em tupela man husat i save long birua bilong Bogenvil, na husat i save long birua i wetim ol tumbuna bilong ol sapos ol i no mekim samting tude long pasim dispela birua i kamap.

Sapos gavman i no laikim narapela Bogenvil i kamap long Madang, em i mas stretim wari bilong ol papagraun.

Sapos em i no bisi long en, na em i go het long amamasim main developa kampani, i gat birua i stap we bai bikpela moa na i abrusim mak bilong Bogenvil hevi.

## WANTOK

Published Weekly, Thursday, for  
Word Publishing Company, Ltd.  
P.O. Box 1982, Boroko, NCD  
Papua New Guinea

**Telephone: (675) 325 2500**

**Fax: (675) 325 2579**

**Email: [editorial@wantok.com.pg](mailto:editorial@wantok.com.pg)**

**Pe bilong wanpela yia  
52 niuspepa**

**Ples:**

PNG

AUSTRALIA

ASIA PACIFIC na JAPAN

AMERICA na EUROPE

**Air:**

K220.00

US\$110.00

US\$150.00

US\$210.00

**General Manager**  
Elizabeth Konga

**Editor**  
Neville Choi

Published at  
Section 58, Allotment 3  
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 56%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.





Program bilong Wanwan De

Mande - Fraide

6am - 10am - Sankamap show - Host: KAS.T
6:15am - Komuniti Notis Bod
6:30am - Nius Hetlains / Bondei grittings
Trukai Rais - GES FAIA KOMPETISEN
6:45am - Niuspepa Hetlains
7:00am - Major Nius Bulletin - YUMIFM Nius Senta
7:15am - Toktok sapolim LO na JASTIS Sekta
7:30am - Trukai Rais - GES FAIA KOMPETISEN
8:00am - Major Nius Bulletin - YUMIFM Nius Senta
8:15am - Stori b'long Skelim Tingting
8:30am - Trukai Rais - GES FAIA KOMPETISEN
9:00am - Nius Bulletin - YUMIFM Nius Senta
9:15am - Luksave long Komuniti (Redio Pilai)
9:30am - Trukai Rais - GES FAIA KOMPETISEN

9:45am - YUMI PAINIM WOK Segment
10:00am - Nius - YUMIFM Nius Senta
10am - 2pm - Monin Trek na Belo Pack - Host: VAVIESSIE
10:10am - Lukatim yu yet - Helt toktok - RH Hyper Mart
10:45am - YUMI PAINIM WOK Segment
11:00am - Nius - YUMIFM Nius Senta
11:10am - Cont'd - Lukauti yu yet - Helt toktok
11:30am - Nius Hetlains b'long Belo Taim
12:00pm - Major Nius Bulletin - YUMIFM Nius Senta
12:10pm - BELO Taim - wantaim sapot b'long TELIKOM
12:15pm - Komuniti Notis Bod
12:20pm - BELO Taim - wantaim sapot b'long TELIKOM
1:00pm - Nius - YUMIFM Nius Senta
1:10pm - BELO Taim - wantaim sapot b'long TELIKOM
2:00pm - Major Nius Bulletin - YUMIFM Nius Senta
2pm - 6pm - Avinun Draiv Taim - Host: Enjo Dabix
2:00pm - 4:00pm (Tunde / Fonde) TOKAUT TOKSTRET
2:45pm - YUMI PAINIM WOK Segment
3:00pm - Nius - YUMIFM Nius Senta

3:10pm - Avinun cruz
4:00pm - NIUS - YUMIFM Senta
4:10pm - "FOAPELA KAM GUD LONG 4"
4:30pm - Nius Hetlains
4:45pm - YUMI PANIM WOK Segment
5:00pm - MAJOR NIUS BULLETIN - YUMIFM Nius Senta
5:10pm - 6:00pm - FLAME KULCHA (1 hr) listeners request
6:00pm - MAJOR NIUS BULLETIN - YUMIFM Nius Senta
6 - 7pm - Maggi noodles request aua
6pm - 00am - NAIT BEAT - Host: ANGRA KENNEDY
6:10pm - 7:00pm Mun kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Papa Raegs / Sally / Nenge
00:00 - Early Monin Taim Cruz (ol lain brukim tulait shift)
- Miusik / Request / Tok pilai
- Kipim Kampani long ol nait shift.

Weekend Shift - Saturday & Sunday
6:00am - 11:00am - Wiken Sanrais
6:30am - Komuniti Notis Bod - Bondei grittings
7am - 9am - Wiken Spots
9am - 11am - Monin Raun
11am - 1pm - National Weekly Hit Parade (Host Kas.T)
2pm - 6pm - Sarere Avinun Draiv
6pm - 00am - Nait Beat (Host Angra Kennedy)

YUMIFM POROMAN TEAM:
Turner (KAS.T) Arifeae - Team Leader / Program Director
Angra KENNEDY - Senior Announcer
Sinimil (Vaviessie) Philipo - Promotions Co ordinator
Papa Raegs - Announcer Nenge Neings - Announcer
Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afeacs
8PM Helt
8.15PM Musik
8.30PM NIUS
8.40PM Spots Riplei
8.55PM Musik
9PM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afeacs
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afeacs
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afeacs
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afeacs
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Redio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Raun wantaim Wantok kru ...

Semi fainol bilong PNG Idol bai kamap dispela wiken

Dispela Sarere long Gold Club long Lamana wantaim helpim bilong nupela dring XOX bai bringim semi fainol bilong PNG Idol 2010.

Dispela resis ol Lamana na XOX i kamapim long soim ol yangpela manmeri husat save singsing bilong ol mas kam aut na singsing.

pela wik i go pinis wantaim 40 pela manmeri, na nau namba i wok long kam daun isi isi we 20 pela tasol i stap yet insait long dispela resis. Long dispela Sarere bai lukim tasol 10pela bai go insait long namba wan semi fainol na narapela 10pela bai traim nek bilong ol long wik i kam biahin. Ol dispela bai resis dispela Sarere em,

Samantha Clark, Chaddy Ipah, Matthew Jordan, Ross Arek, Hendry Gewang, Kimberly Tola, Daniel Fabila, Edwina Fabila, Pomsy Sayape na Rowena Awai, ol dispela 10pela bai kirapim Gold Club wantaim nek bilong ol.

Sapos yu nogat samting long mekim dispela wik Sarere nait, kam tasol long Gold Club na lukim ol dispela yangpela i traim nek bilong ol, dispela nait tu yu ken putim pink pela siot o klos long makim Kensa Society long Pot Mosbi na yu ken winim sampela prais.



Antap: Meri Samatex, Samantha Clark lukluk long kisim PNG Idol 2010. Poto Nicky Bernard

Kimberly Tola bai traim gen dispela wiken. Poto Lamana Hotel

93FM YUMIFM National Weekly Hit Parade: Sponsor: Digicel - bigger, better network. Produced & Host by: Kas.T. Statistics: Tahaigu Sophie & Poroman Crew. Week Ending: Saturday - 30th October 2010. Table with columns: Week Before, Last Week, This Week, Charting Song, Artist.

EMTV Television Guide

Table with 4 columns: Time Slot, Channel, Program Name, and Date. Rows include programs like EMTV NEWS UPDATE, CLASSROOM BROADCAST, STATION OPEN, JOYCE MEYER, TODAY, EMTV PRIME TIME LINEUP, NATIONAL EMTV NEWS, A CURRENT AFFAIR, SPORTS SCENE, EMTV TOK SAVE, RAIT MUSIK, ELITE MUSIC ZONE, DIGICEL STARS, BROTHERS & SISTERS, AUSTRALIA NETWORK, FRAIDE, OKTOBA 29 2010, STATION OPEN, JOYCE MEYER, TODAY, EMTV PRIME TIME LINEUP, MAGICAL TALES, THE KINGDOM OF PARAMITHI, PARALLAX, THE SHAK, EMTV TOK SAVE, HOT SOURCE, G2G: GOT TO GO, THE KINGDOM OF PARAMITHI, PARALLAX, THE SHAK, EMTV TOK SAVE, HOT SOURCE, NATIONAL EMTV NEWS, WHO WANTS TO BE, MILLIONAIRE - HOT SEAT, CRIME STOPPERS, NATIONAL EMTV NEWS, A CURRENT AFFAIR, IN MORESBY TONIGHT, THE BLOCK (NEW SERIES), RPA - Medical drama, NATIONAL EMTV NEWS REPLAY, AUSTRALIA NETWORK, STATION OPEN, IT IS WRITTEN: HILLSONG, AUSTRALIA NETWORK, NATIONAL EMTV NEWS, DIGICEL STARS, 60 MINUTES, SUNDAY NIGHT MOVIE: TBA, HILLSONG, NATIONAL EMTV NEWS REPLAY, AUSTRALIA NETWORK, STATION OPEN, IN MORESBY TONIGHT, EMTV TOK SAVE, PGHEY HEY IT'S SATURDAY, MANDE, NOVEMBA 1 2010.



TORO



BIABIA



KANAGE



TOKWIN

Ol maunten bilong Mosbi wok pinis nau.

Mosbi i no moa olsem bipo, sapos yu save long Mosbi taim yu stap long 1980 na 1990 bai laikim tru, nogat planti haus, nogat planti manmeri na nogat plant kar. Tasol nau yu kam bai ai bilong yu lukim bikpela senis, bai yu paul tu sapos long pela taim yu no kam long Mosbi.

Ol maunten yu save lukim i wok long pinis isi isi, ol haus i wok go antap, ol rot i wok long go long en na sampela wok long dikim long kisim graun. Dispela mekim na ol maunten we sampela diwai stap long en i stap nat-

ing olsem em no pasim laplap o gat bikpela kela stret, laki na ol mauten bilong Mosbi i gat strongpela graun na sapos nogat bai yumi lukim planti han rot bai pas long wanem olgeta graun bai kam pasim rot. Tokwin tasol.

Manus nogat Lo na Oda.

Liklik Ailan tasol tingting save kilim ol. Long wik i go pinis, yumi harim olsem ol ples lain, i bin go na kukim polis station na ronim ol polis manmeri.

Long wanpela wik Manus Ailan i bin stap wantaim nogat Lo na Oda long Provins bilong ol, planti long ol pikinini Manus husat i wok na stap

outsait long narapela provins i no amamas long dispela hevi.

Ol i no amamas long ol polis long paitim dispela ples man na em dai long han bilong ol. Ol tu i brukim Lo bilong polis.

Ol tu i no amamas long ol ples lain long kisim Lo i go long han bilong ol yet na go kukim polis station we em i han bilong Gavman.

Tupela grup wantaim mas bung na stretim toktok na sindaun bilong ol pipol long Ailan bai kam gut gen. Dispela hevi tasol mekim na nem bilong Manus i go daun likk tasol i no go daun olgeta.

Tokwin stap wantaim yupela.

Grid of letters for a word search puzzle.

Painim ol dispela tok bilong ron long balus:

Table listing words found in the word search: BALUS, ISLANDS NATIONAIR, KOPI, SIA, LAIP JAKET, AIR NIUGINI, PLES BALUS, TIJUS, TIKET, EA HOSTES, AIRLINES PNG, KAGO, BISKET, SEKIN, PAILOT, MAF, TI, SIA LET, SEKYURITI, SUTKES.

6x6 grid for a 360-degree Sudoku puzzle.

9x9 grid for a standard Sudoku puzzle.

Ansa bilong las wik Sudoku

Ansa bilong las wik Pasol

15x15 grid for a crossword puzzle.

EMTV Television Guide

EMTV Television Guide table with columns for time, channel, program name, and date (November 2 and 3, 2010).





Oi lain husat i stap long woksop bilong BRIDGE Projek long Lamana Hotel

# BRIDGE Projek opim tingting long ol meri na ileksin proses

James Kila i raitim

SAMPELA lain nius manmeri, wantaim ol wok manmeri bilong PNG Ilektoral Komisn (PNGEC) na ol lain long provinsel administresen long Sauten rijen i bin stap insait long wanpela gutpela kos o woksop long Mosbi long las wik we i glasim wanem ol meri i ken mekim insait long ileksen wok.

Na wanpela gutpela kos tru we i givim tingting long yusim "BRIDGE Projek" long skulim ol lain husat i redim ileksen long luksave long wok ol meri i ken mekim.

## Wanem samting em "BRIDGE"?

BRIDGE em wanpela profesenal developmen tul we ol lain i save kamapim long planti hap insait long wok long helpim ol ileksen menesmen bodi, ol stekholda na ol lain husat i save laik lukim olsem ileksen i ron gut na bihainim gutpela pasin.

Dispela modiol o kain program bilong holim kamap BRIDGE em i bin kamap wantaim helpim na sapot i kam long UNDP, Intanesenel Faundesen bilong Ilektoral Sistems (IFES), Intanesenel Institiut bilong Demokrasi na Ilektoral Asistens (IDEA), Yunaited Nesens (UN) na Australia Ilektoral Komisn (AEC).

BRIDGE i gat planti ol modiol o eria em i save kamapim ol kos o woksop long en. Tasol dispela kos mi wantaim wanwok bilong mi Veronica Hatutasi i bin stap long en long las wik i lukluk long 'Jenda na Ileksin'. Dispela i min wanem kain ol rot na wei i stap long lukim ol meri i ken resis long ileksen o meri i ken gat sans long vot na makim lida.

BRIDGE em wanpela gutpela kos tru na long las yia 2009, projek ya i bin winim Yunaited Nesens (UN) Pablik Sevis awot long Barcelona, Spain.

Dispela kain kos em i gutpela tru na ol i save holim long helpim ol kantri insait long wok long sait bilong ilektoral menesmen bodi, ol lain stekholda na ol lain husat i save sapotim na wok klostu long karimaut ileksen.

Ol lain husat i go pas long ronim woksop long Mosbi long las wik em tupela lain opisa bilong Australia Ilektoral Komisn, em Cate Thompson na Gordon Marshall na tupela woklain bilong PNGEC, Regina Lunge na Alwin Jimmy.



NBC ripota Aaron English i kauntim vot long mok ileksen long woksop. Foto: Veronica Hatutasi

## Kisim gutpela skul na tingting

Olgeta lain husat i bin stap insait long dispela woksop i amamas tru long ol skul ol i kisim bikos woksop ya i givim ol gutpela save na tu em i opim tingting tru bilong ol long luksave long wanem wok ol meri i ken mekim long helpim insait long ileksen na long ol lida long mekim disisen long gutpela sindaun insait long komyuniti.

Bikpela astingting bilong dispela Jenda na Ileksin kos em long ol Ileksin Menesmen Bodi (EMB) long save gut long wok ol meri i ken mekim long sait bilong ilektoral wok, na wanem rot long mekim dispela i kamap gut. Moa long en tu em long helpim ol wimen advokasi grup o lain husat i save promotim wok bilong ol meri long save gut long ilektrol proses na ol developmen plen long promotim ol meri insait long ileksen proses. Em i redim ol tul tu long ol meri long luksave moa long sait bilong ol meri insait long wok-bung namel long ol meri long ileksin proses na tu promotim wanpela kain network namel long ol wimen edvokesi group.

Dispela woksop i opim tu tingting bilong ol lain husat i stap long woksop long dispela tupela bikpela het-tok em long "Sex" na "Gender".

Woksop ya i tok klia olsem "sex" em soim wanem samting em narakain long taim mama i karim wanpela

man o meri na dispela i stap long blut na kamap bilong man o meri na em samting i stap long taim yet mama i karim ol man o meri.

Na narapela het tok "Gender" i tok long sosel sait we i narakain namel long man na meri na pasin ol man na meri i wok wantaim na lukluk long en na dispela em long sait bilong kalsa na pasin bilong wok wantaim.

## Hevi save kirapim ol meri long wok

Woksop i soim tu olsem insait long sampela kantri long wol we woa na trabel i kamap long en olsem Rwanda long Afrika, bihain long ol dispela hevi bikpela namba bilong ol meri i wok long go insait long ol lidasip posisen long gavman na ol meri i kisim wok insait long palamen long mekim disisen long kantri. Wankain samting tu i kamap long ol narapela kantri long wok.

Misis Lunge i soim wanpela gutpela rekot long PNG we i soim hamas meri i bin go insait long palamen bihain long ileksen. Long 1977 tripela meri i bin winim ileksen na go long Nesenel Palamen. Ol dispela meri em Josephine Abajah long Nesenel Kapitel Distrik (NCD), Nahau Rooney long Manus na wanpela arapela meri tu.

Tasol long 2007 wanpela meri tasol i winim ileksen na i go long Palamen.

Plantitoktok insait long grup i bin kamap long woksop long wanem samting ol meri i mas mekim long winim ileksen na tu moa aweanes i mas kamap long givim tingting long ol manmeri long makim ol meri long givim vot long ol meri husat i gat save na strong long makim ol pipel insait long ileksen.

## Helpim wok ileksen plening

Dispela woksop i givim gutpela tingting tu long sait bilong mekim ol plen long ronim ileksin we bai i gat pasin bilong wanbel na fea pasin i ken stap. Ol lain long woksop i bin lainim tu olsem i gat planti ol narakain sistem bilong ileksin. Long PNG yumi save yusim nau Limited Prefrensial Voting (LPV) sistem, tasol insait long wol i gat kain kain ol ileksen sistem i stap.

Woksop i givim tingting tu olsem gavman bilong kantri i ken traim wanem sistem em i laik long yusim sapos em i ting dispela sistem i gutpela long laik bilong em yet.



# Ol tisa skul long sevim mangro

Steven Gimbo (WWF) i raitim

WANPELA pailot trening kos bilong skulim ol tisa long mangro diwai i bin kamap long mun i go pinis. Dispela trening kos em bilong ol tisa i mas luksave long helpim long sevim ol mangro diwai bilong yumi long PNG.

Dispela skul bilong mangro em i wanpela samting ol pipel i mas save bai ol i ken lukautim gut ol mangro diwai long nambis na long ol ples tais bilong yumi.

Dispela wan wik skul i bin kamap long Tubuserea Praimeri Skul long skulim ol tisa long rot bilong lukautim gut ol mangro. Dispela skul i bin kamap wantaim wokbung namel long Wol Wait Fan fo Netsa (WWF), na wanpela ejensi bilong Yunivesiti bilong Papua Niugini, ol i kolim Motupore Ailan Risets Senta (UPNG-MIRC).

Nainpela tisa i bin kamap long dispela kos, na ol i bin lainim ol kain skul olsem mangro na we em i save gro, ol birua we i save bagarapim mangro, we bilong strongim ol mangro long gro gut, we mangro i save helpim sindaun bilong ol pipel, kamapim skul buk bilong yusim long skulim ol pikinini, na kamapim ol we bilong mekim wok awenes.

Ol skul tu i bin kam long sampela savemanmeri insait long ol NGO na bilong UPNG. Ol i bin kisim tu ol fil trip o raun bilong skul we ol i go long ol nambis ples long lukim na kisim skul long groa bilong mangro.

Ted Mamu, wanpela program menesa bilong WWF, i tok dispela em i namba wan taim ol i kamapim dispela kain kos, na kos i bihainim wokbung em UPNG-MIRC wantaim WWF i bin mekim wantaim ol komyuniti insait long eria long planim gen na stretim ol mangro.

"Planti taim ol pipel i no luksave long mangro olsem wanpela bikpela samting inap em i pinis olgeta. Taim i nogat mangro moa, yumi stat long lukim olsem i nogat planti pis bikos mangro em i olsem haus bilong ol long karim pikinini na kamap bikpela," Mista Mamu i tok.

"Long skulim ol pikinini em i bikpela samting, bikos dispela nupela jeneresen bai kamap bikpela wantaim save bilong mangro, na mi bilip dispela toksave bai go kamap long ol famili na komyuniti bilong ol bilong bihain taim tu."

Wanpela tisa bilong Barakau Praimeri Skul, Mis Josephine Tamarua, i tokaut olsem dispela kos em i gutpela tru we i tokaut long bikpela wok em mangro i save mekim long laip bilong ol nambis manmeri.

Mis Tamarua, husat i save skulim 7-pela sabjek long ol gred 7 sumatin, i tok em i amamas tru long dispela kos we WWF i kamapim wantaim helpim bilong UPNG-MIRC.

"Bipo long mipela i kisim skul long mangro, mipela i no save long wanpela samting. Mipela i save olsem ol mangro i gutpela paiawut. Tasol nau, bihain long kos, mipela i save olsem i gat planti kain kain diwai mangro i stap na kain helpim ol i save givim long sindaun bilong ol pipel," Mis Tamarua i tok.

"Nau mipela i save na mipela bai go bek long ol skul bilong mipela na tokaut long bikpela wok em mangro i save mekim long helpim sindaun bilong ol komyuniti, na mipela i mas helpim long banisim na helpim ol long groa gut," em i tok.

Mis Tamarua i tok tu olsem olgeta komyuniti i mas wokbung wantaim.

"Mipela ol tisa bai skulim ol pikinini, tasol olsem wanem long komyuniti? Yumi bai save olsem wanem olsem ol pikinini i go na skulim ol papamama bilong ol tu?" em i askim.

Em i tok moa olsem ol posta, buklet na narapela awenes samting bai helpim ol tisa long go aut na skulim.

Narapela tisa, Eno Mauri bilong Barakau Praimeri Skul, i wanbel long toktok bilong wan-

wok bilong em. Em i tok olsem i mas gat moa wok awenes long mangro na long wankain taim, sapot bilong ol kaunsila na lidaman long ples i bikpela samting sapos yumi laik helpim na banisim ol mangro.

Mista Mauri, husat i save skulim ol gred 7 na 8 sumatin, i tok olsem ol samting we ol i kisim long trening kos em i gutpela bikos WWF na UPNG i mekim long isi we bilong ol lain husat i kisim kos long lainim ol samting.

"Mipela i lainim samting wantaim ama-

mas, na mi mas tok tenkyu long ol lain husat i givim mipela kos long we ol i mekim samting i kamap isi long mipela. Na mipela i lainim gut tru olsem mangro i gat bikpela samting em i save mekim long laip bilong mipela."

Em i tok olsem planti lain husat i save stap long hap i gat mangro i save ting olsem mangro em i wanpela samting nating.

"Mipela ol asples man i save ting olsem mangro em i samting nating bikos mipela i

bikpela wantaim ol mangro na taim mipela i bagarapim ol mangro, mipela i no luksave long bikpela wok ol i save mekim. Ol mangro i save stap olsem haus bilong ol pis na ol arapela samting bilong solwara," em i tok.

Bihainim dispela pailot-projek trening, bai ol trena na WWF wantaim UPNG-MIRC i wokbung wantaim long kamapim wanpela tisa trening gaid, na wanpela skul karikulum, we bai olgeta skul i ken yusim long skulim ol pikinini long mangro.



Australian Government  
Aid Program



## INCENTIVE FUND

Australia and Papua New Guinea working together, strengthening organizations, building stronger communities

### PABLIK NOTIS

Gavman bilong Papua Niugini (GoPNG) na Gavman bilong Australia (GoA) i amamas long tokaut olsem nupela Incentive Fund i stat nau long kisim ol aplikasin long ol PNG ogenaisesen husait i wok gut na i orait long kisim halivim i kenputim aplikasen **olgeta taim insait long wanpela yia.**

Incentive Fund 2010-2014 em wanpela wok halivim bilong Australia Aid Program. Hai Komisina bilong Australia, Ian Kemish na Minista bilong Nesenel Plening na Distrik Developmen, Hon. Paul Tiensten i bin mekim toksave long Mas 10, 2010. Insait long toktok bilong tupela, Hai Komisina na Minista, i tok amamas long gutpela wok namel long tupela gavman we i lukim gutpela wok i bin kamap long pastaim wok bilong Incentive Fund. Ol i tokaut tu long gutpela halivim Incentive Fund i bin kamapim insait long ol wok bilong edukesin, helt, agrikalsa, ol rot long bringim mani na wok namel long ol man na meri insait long komuniti.

Incentive Fund wok i stap aninit long lukautim na go pas bilong Incentive Fund Menesmen Grup we ol i save bung long olgeta 3-pela mun. Insait long dispela grup, i gat tripela independen sinia Papua Niugini man na meri na, wanpela wokman bilong Dipatmen bilong Nesenol Plenin na narapela wokman i makim AusAID.

Menesmen Grup i lukautim wok bilong polisi, plening na lukluk long wok bilong ol projek. Dispela i karamapim olgeta disisen we i go wantaim wok bilong glasim gut na skulim ol aplikasin na wok bilong makim mani i go long ol projek.

**Incentive Fund Menesmen Grup i laik toksave long ol PNG ogenaisesen husait i wok gut na i orait long kisim halivim olsem ol infomesin pepa long aplai long kisim mani nau i redi Yu ken lukim long ol dispela buk na pepa:**

- **Infomesin Buk** (I gat olgeta infomesin long rot bilong kisim halivim long Incentive Fund, ol rot bilong bihainim na wanem i ken givim tok orait long ogenaisesin long kisim halivim).
- **Infomesin Pamplet** (Poket sais buk we i gat olgeta toksave bilong Incentive Fund).
- **Konsep Propasal Aplikasin** Fom (Wanem ol samting yu mas mekim bipo long yu inap givim wanpela aplikasin)
- **Tok-tru Pepa** (Olgeta toktok long ol wok bilong divel-

opmen na Incentive Fund Program infomesin, we i karamapim ol wok olsem wok bilong man na meri (Jenda), HIV/Aids, Disabiliti na ol narapela)

**Bikpela Toktok bilong ol ki eria em Incentive Fund save halivim na wanem samting ol ogenaisesen i mas mekim:**

- ✓ Soim olsem ogenaisesin bilong yu em wok gut na i gat ples klia tingting na pasin long wok bilong em;
- ✓ Soim olsem projek yu laikim wokim i mas go wantaim na halivim wok developmen GoPNG na GoA i laik kamapim;
- ✓ Mani mak yu ken askim long em i mas stap namel long K500,000 na K10 milien;
- ✓ Soim stret mani ripot (odit) bilong yu long akaun bilong ogenaisesen insait long tupela yia;
- ✓ Soim stret pepa tru bilong taitel bilong graun (len taitel);
- ✓ Soim stret projek menesmen ekpiriens na tokim mipela long wok yu bin mekim;
- ✓ Soim olsem dispela projek i ken go het gut long bihain taim;
- ✓ Soim tru olsem wanem samting projek i kamapim bai wanpela man tasol i no inap kamap papa long em;
- ✓ Soim tru olsem i gat wok bung wantaim i stap long Gavman, kominiti na ol narapela lain husat i save givim wok halivim long kominiti;
- ✓ Soim tru olsem dispela projek i lukluk long halivim ol bikpela hevi na wok olsem HIV/AIDS, wok namel long ol man na meri, disability, lukautim ol pikinini na bus, na graun.
- ✓ Ol ogenaisesin husat i kisim halivim long bipo na i laik givim gen proposel long namba tu na namba tri taim i mas givim 10% kontribusen mani bilong ol. Dispela i mas kamap long taim stret taim dispela pablik notis i kamaut.

Plis toksave long mipela wanem rot tru mipela bai givim ol dispela pepa long ogenaisesin bilong yu na Incentive Fund bai e-mail, fax o salim long meil ol dispela pepa i go long yu. Yu ken kam lukim mipela tu long ofis long Ela Beach Tower long namba tu floa.

Kontek bilong mipela em: Telefon 320 0782/3, Facsimile: 320 1863, Email: [enquiries@incentivefund.org](mailto:enquiries@incentivefund.org) or Postal Adres: P O Box 776, Port Moresby, NCD.



# Raun wantaim Kanage olgeta wik

## Maiwara bloap

KANAGE em bilong Maiwara, wanpela liklik ples long NCR, Madang provins. Em i wok wantaim RD Tuna. Wanpela taim em i wok i go na em i pilim sik. Em nau em i go tokim bosman bilong em, "Bos, mi sik nogut tru na mi tingting long go long haus". Bosman bilong em bekim, "Kanage, yu mas i go kisim marasin pastaim long haus sik. Bihain yu ken go long haus". Kanage i go long liklik haus sik bilong ol na lukim wanpela nes. Nes tokim em, "Kanage, bai mi putim glas na sekim sapos skin bilong yu hat". Nes sekim skin bilong em na tokim Kanage, "O papa, glas bilong yu i go antap olgeta!" Kanage harim dispela na em tokim nes, "Plis nes, serve mi kwikli. If not in a few minutes my temperature high, I'll blow up!"

**Freda Apelis**  
NCR, Madang



## Luk stil man

KANAGE em man bilong luk stil long ol meri taim ol waswas. Wanpela Sarere avinun, wanpela yangpela meri i go long waswas long wara. Kanage kwik taim ron i go pas na hait i stap. Meri kam long wara em senis na waswas i stap. Em waswas i go na em tingim toktok bilong ol meri olsem yu mas kisim was na waswas, Kanage em man bilong lukluk stil long ol meri waswas. Hariap meri ya sindaun i go insait long wara na em lukluk was long Kanage. I no long taim na ai bilong tupela pas long tupela yet. Meri ya singaut nogut tru. Kanage kirap nogut na em pundaun nating i go insait long wara. Ol

brata bilong meri harim singaut bilong em na ol ron i kam wantaim ol naip na akis. Kangage hariap ron i kam autsait long wara na lek pas long as na boi lus nating long bus.

**Barna Alla**  
Yamok Pagwi Patrol Post  
East Sepik Provins

## Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg



**NEM:** Lopecii Loapa

**KRISMAS:** 17(man)

**ADRES:** PNG Bible Church, P.O Box 363, Mendi, S.H.P

**SAVE LAIKIM:** Pilai volibol, harim musik.

**NEM:** Ronda Elmale

**KRISMAS:** 20 (meri)

**ADRES:** Pes Catholic Mission, P.O.Box 179, Aitape Sandaun Provins

**SAVE LAIKIM:** Go lotu, mekim pani, lukim TV na mekim pen pal

**NEM:** Mariatha Seilupe

**KRISMAS:** 27 (meri)

**ADRES:** Pes Catholic Mission, P.O Box, 179 Aitape, Sandaun provins

**SAVE LAIKIM:** Mekim pani, go lotu, pilai soka na volibol, harim musik na lukim TV

**NEM:** Ronald Wama

**KRISMAS:** 25 (man)

**ADRES:** C/-B.E.F, P.O.Box 84, Maprik, E.S.P

**SAVE LAIKIM:** Kompyuta study, Accounting study, Economics stadi, pilai spot, mekim pren na go lotu.

**NEM:** Karl Giri

**KRISMAS:** 36 (man)

**ADRES:** Semoroks Gospel Club, P.O.Box 3368, Lae, Morobe Provins

**SAVE LAIKIM:** pilai lid gita, komposim na singsing long God, painim meri lotu long helpim long singsing.

**NEM:** Mary -Grace Walete

**KRISMAS:** 19 (meri)

**ADRES:** Pes Primary School, P.O.Box 36, Aitape, Sandaun Provins

**SAVE LAIKIM:** lukim TV, harim musik, go lotu, pilai soka na basketbol, mekim pani

**NEM:** Keiken Elmale

**KRISMAS:** 24 (man)

**ADRES:** Pes Primary School, P.O.Box 36, Aitape, Sandaun Provins

**SAVE LAIKIM:** Mekim pani, pilai soka, harim musik na lukim TV

**NEM:** Franklyn Wamo

**KRISMAS:** 26 (meri)

**ADRES:** Pes Primary School, P.O.Box 36, Aitape, Sandaun Provins

**SAVE LAIKIM:** Mekim pani, go lotu, pilai soka, harim musik na lukim tv

**NEM:** Annie Mary Yuwei

**KRISMAS:** 20 (meri)

**ADRES:** Pes Primary school, P.O.Box 36, Aitape, Sandaun Provins

**SAVE LAIKIM:** Pilai soka, volibol, mekim pani, go lotu, harim musik na lukim tv

**NEM:** Amos Geyamme

**KRISMAS:** 23 (man)

**ADRES:** Guyata Elementary School, P.O.Box 386, Eriku, Morobe Provins

**SAVE LAIKIM:** Pilai soka, ritim buk na go lotu

# Kristen man laik marit ken

## Dia Laiplain

MI WANPELA Kristen man husat i marit na i gat tupela pikinini. Tasol mi laik maritim namba tu meri. Dispela narapela meri i bruk marit na em wantaim meri bilong mi i gat gutpela luksave na tu, meri bilong mi tok orait pinis long tingting na laik bilong mi.

Ol lain bilong meri bilong mi na ol lain tu bilong mi wantaim i wanbel, tasol papamama bilong dispela narapela meri i nogat. Meri ya i strongim mi na mi redi long baim em.

Olsem Kristen, mi laikim stiatok bilong Laiplain sapos bai mi go het na kisim namba tu meri o mi bai lusim em.

## UNDECIDED CHRISTIAN

Tenkyu long rait i kam long Laiplain long serim wari bilong yu wantaim mipela.

Yu tokim mipela olsem yu wanpela Kristen, marit na yu gat tupela pikinini tasol nau, yu laik kisim namba tu meri. Yu tok ol lain bilong yu na meri bilong yu i wanbel long tingting olsem yu laik maritim namba tu meri, tasol ol lain papamama bilong namba tu meri i no laik. Tasol yu tok yu wanpela Kristen, na olsem yu rait i kam long Laiplain long kisim helpim long sait bilong Baibel.

Wanpela moa taim gen, mipela i amamas long yu olsem wanpela Kristen, yu kam long mipela long kisim helpim long sait bilong marit bikos marit em samting God yet i sanapim. Gutpela pasin i stap long famili na marit em i bikpela samting long God. Taim famili i stap gut wantaim, sios bai stap gut tu.

Hevi we yu wok long bungim i kamap planti tasol em i sori samting long lukim olsem sampela Kristen i wok long mekim na dispela em bikos ol i no klia gut long ol tok i stap long Baibel. Em i hap long kalsa bilong yumi long wanpela man i maritim moa long



wanpela meri na olsem, long PNG, em i wok long kamap. Tasol em i helti? Em i kamapim ol famili i amamas? Em i fea o gutpela long ol meri na ol pikinini? Dispela em sampela ol kwesten o askim yumi olgeta i mas ansaim. Tasol pren, antap long olgeta samting, Tok bilong God i tok wanem long man i maritim moa long wanpela meri na brukim marit o divos?

Pastaim mipela i laik soim yu sampela tok tru long buk Baibel i sut long marit. I gat planti i stap, tasol bai mipela i autim sampela tasol long yu i ritim. Plen bilong God long marit long Jene-sis Sapta 2:22 i tok "Olsem tasol na man i mas lusim papa na mama bilong em na go stap wantaim meri bilong em na ol bai kamap wanpela." Lukim gut, em i no tok ol meri tasol meri we i min olsem wanpela meri tasol. Wankain toktok i kamap long Mark 10:7,8, Matyu 19:5 na Korin 1, 6:16.

Namba tu, bai yu luksave olsem taim yu lukim narapela meri, yu wok long mekim sin pasin o adaltri. Maski meri bilong yu, ol famili bilong em na bilong yu i wanbel long dispela na yupela i lukim olsem em i stret, em i sinpasin yet. Ritim Matyu 5:27,28.1 na Peter 3:1-7.

Namba tri, Baibel i tok wanem long ol meri i bruk marit i stap o marit long ol. Em i tok man i maritim meri i bruk marit i wokim sinpasin. Matyu 5:31,32.

Namba foa em, laik pasin bilong God. Laik pasin God i gat em long wokim sakrifais long ol selpis laik yumi gat long narapela. Na long marit laip, man i mas woki olgeta samting long lukim olsem dispela laik pasin i stap strong, wankain tu long sait bilong meri

bilong em. Pren, long ol Baibel skriptja, mipela i bilip olsem yu luksave long posisen yu stap long en. Yu wok long bihainim laik bilong husat? Meri bilong yu, ol pikinini o bilong yu yet? Pren, tingting long dispela.

Baibel i tambuim pasin long wanpela man i maritim moa long wanpela meri na sinpasin bikos em i no stret long ai bilong God. Sin pasin i bagarapim ol famili, komyuniti, sios na kantri. Amamas long gat planti meri i bilong liklik taim tasol tasol hevi yu bai karim long laip bilong yu i bikpela moa. Ol narapela i ken lukim olsem em i stret, tasol olsem wanem long ol pikinini bilong yu? Yu askim ol long tingting bilong yu long dispela? Yu ting bai ol i amamas long serim wanpela papa wantaim ol pikinini bilong narapela meri? Bai em i fea o stret long ol?

Mipela i tubel long yu i tok meri bilong yu na ol lain bilong em i wanbel long tingting bilong yu. Yu tok tru o nogat?

I moabeta yu go lukim sios pasto bilong yu o, tupela marit i gutpela pren bilong yu long givim yu stiatok long sait bilong marit. God i laikim yu nai laikim yu long stap amamas long marit yu gat long en na ol pikinini bilong yu. i moabeta yu no giamanim God tasol askim long gutpela stia bilong em na em bai kamapim gut marit bilong yu. Ritim 1 John 1:9.

God i ken givim yu gutpela stia.

Pren bilong yu

**Laiplain**

**Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.**

**Laiplain**





# SMS Banking Digicel Top Up.

SMS BANKING  
- APPLY NOW



### To apply, you'll need

1. Your Kundu Card
2. Your BSP Account Number + details
3. Mobile phone number
4. Names + BSP Account Numbers for deposits to other BSP account holders
5. Fill in an Application Form today



Love your bank

www.bsp.com.pg

## Hela papagraun kampani wok bung wantaim Brunel

Paul Zuvani i raitim

**HIDES Ges Risoses Limited (HGRL) bilong Hela Provins aste i sainim tok orait wantaim Brunel Intanesenel (Brunel) bilong Australia long mekim wok long kamap bilong wel na PNG Likufaid Neturel Ges Projek.**

Oi mausman bilong HGRL long PDL 1, wantaim tupela lokol Memba em John Kekeno bilong Koroba Lek Kopiago na James Marape bilong Tari Pori husat i Ministia bilong Edukesen, i kamap long Hideaway Hotel sainim dispela tok orait.

Willy Wandiya, Siaman bilong HGRL long taim bilong saining, i tok ol lokol manmeri i gat laik long mekim wok tasol i nogat gutpela saveman i stap bilong go pas long ol kain bikpela wok olsem LNG projek.

Tasol nau mipela i amamas olsem ol i sainim tok orait wantaim Brunel long kamapim ol wok.

Brunel i gat save na i go pas long kamapim ol saveman bilong LNG projek na bai mekim ol wok.

"Wantaim tok orait namel long mipela na Brunel, mipela i bilip dispela wokbung bai kamap gut.

"Dispela em i bikpela mak long ol papagraun i ken kisim save na mekim ol wok long ol kain projek olsem LNG projek," Mista Wandiya i tok.

Long bekim, Paul Smith, Eksekutiv Dairekta bilong Brunel, i tok Brunel i gat longpela stori long ol kain projek olsem wel na ges we dispela i stat long Napa Napa Wel Rifaineri long 2000.



**KAMAPIM WOK:**Sampela kain ol wok olsem mekim rot we kampani bilong ol papagraun inap long mekim.

Dispela nau i senis na mipela i kisim ples pinis long mekim wok insait long kantri.

Na Mista Marape i tok amamas long kain tok orait i kama namel wantaim HGRL na Brunel long wanem dispela i soim ol i ken mekim wok.

Tasol it ok ol papagraun i no ken tingting long kamapim wanwan ol kampani bilong ol.

Dispela bai lukim wanem win mani em gavman i givim long projek bilong ol bai liklik.

Em i givim piksa long Gigira Di-velopmen Koporesen we em ko-

poresen bilong planti ol papa graun.

Em i bisnis bilong planti ol papa graun.

"Long dispela taim planti ol kampani em ol kampani bilong planti ol arapela kampani.

"Taim dispela bikpela kampani i

mekim wok em i save kisim bikpela mani na win mani em i givim long wanwan ol kampani i bikpela.

"Dispela i wanpela gutpela mak bilong ol papagraun i bung na kamapim wanpela bikpela kampani," Marape i tok.

## APEC kantri skruim tingting long sapatim wok bilong kamapim kaikai

OL kantri long Pasifik Rim i tok orait long strongim wok bilong agrikalsa na salim ol samting bilong ol na invesmen long namba wan ministerial kibung long fud sekyuriti long Siapan long las wik.

Dispela 21 memba Asia-Pasifik Ekonomik Koporsen (APEC) kibung i kisim ol toktok bilong Niigata Dikleresen long APEC Fud Sekyuriti na Eksen Plen we i lukluk long stretim hevi bilong mak bilong namba bilong ol manmeri na klaimet senis.

"Kamapim namba na gutpela kaikai long APEC rijen long wok bilong kepesiti long ol rurel komyuniti, bai helpim long stretim sampela ol hevi bilong kamapim bilong planti ol manmeri na kamapim

mani tu," dispela pepa i tok.

Papua Niugini husat i memba bilong Asosiesen bilong Saut Is Esien Nesen (SEAN) em Ministia bilong Agrikalsa, John Hickey, i makim na kamap long kibung.

Mista Hickey i go wantaim Sekretari bilong Agrikalsa na Laipstok Anton Benjamin.

Oi bikpela as tingting bilong Niigata Dikleresen long APEC Fud Sekyuriti we ol 21 memba kantri i kisim em:

- LUKSAVE long laik i stap bilong kamapim planti kaikai;
- WOKBUNG na daunim hevi bilong klaimet senis na redi long ol bikpela hevi we bai kamap;
- TOK orait long promotim gut-

pela wok bilong mekim invesmen insait long agrikalsa sekta;

- TOK orait long kamapim ol maket bilong wok agrikalsa; na
- SKRUIM kibung we i pinis nating long Doha long ol toktok bilong kamapim fri maket.

Namba wan APEC ministerial kibung long toktok bilong fud sekyuriti i kamap bikos long laik i stap long kamap bilong wol populesen na daunim hevi bilong ol sas bilong kaikai i go antap we i stat long 2007 na 2008.

Fud na Agrikalsa Oganaisesen bilong Yunaited Nesens i tok sapos ol gavman i min long daunim hevi bilong hangre orait ol i mas wok hat na surukim mak bilong kamapim

kaikai i go antap long narapela 70 pesen.

Dispela bai lukim ol inap long givim kaikai long 9 bilion manmeri long 2050.

APEC kibung i soim laik long skruim kibung we i pinis nating long Doha kibung long ol toktok bilong kamapim fri maket.

Oi kantri i bung tu long skruim 2008 APEC kibung we i toktok long pasim ol rot bilong mekim invesmen, tred na eksport inap long 2011.

Aninit long eksen plen, ol memba kantri i kisim askim long mekim wanwan ol wok long strongim tingting bilong sekyuriti na kibung i bin bung na passim tok long tokaut long ol dispela wok long ol ministia

long wanwan ol yia.

Siapan i kisim sia olsem siaman bilong dispela kibung long namba wan taim taim dispela grup i kamap long 1995 na i bin wok long holim planti ol kibung long Siapan.

APEC na dispela i kisim tu Siapan, Australia, Saina, Meksiko, Rasia, Saut Korea na Amerika i kisim hap bilong ol wok bilong ikonomi long wol.

Oi7-pela memba kantri bilong Asosiesen bilong Sautis Esian Nesens (SEAN) we PNG i wanpela bilong ol i stap long APEC tu.

Oi toktok bilong dispela kibung em ol oganaisa bai kisim i go long kibung bilong ol lidaman bilong APEC long Yokohama, Siapan long Novemba dispela yia.



# Isten Hailans meri fama pulim ai bilong manmeri long siti

Busisi Siwaka (DAL) i raitim

OL meri long Isten Hailans provins i amamas long wokabout bilong ol i go long Mosbi.

Oi 18 meri, planti em ol fama na agrikalsa opisa, i amamas long plaua so em ol i mekim long amamasim indipendens anivesari.

Wantaim plaua bilong ol em ol tomato na karot.

Planti ol plaua i kisim laik bilong foapela de so we i kamap long Waigani At Tiata long dispela taim.

Asosiesen Vais Presiden Jennifer Kena i tok ol meri i baim rot bilong ol yet long go long Mosbi.

Wantaim dispela wokabout i opim ai na tingting bilong ol long nupela ples na samting na ol i amamas.

Oi i lukluk long mekim wankain wokabout long

narapela yia.

Tasol i tingting ples bilong so em ol i mas putim long wanpela hap bilong Mosbi we planti manmeri i ken go na lukim.

Oi i kisim namba wan prais long plaua so bilong ol na namba tu prais long mak bilong wan wan provins.

Mis Kena i tok 8-pela provin-sel Dipatmen bilong Agrikalsa na Laipstok (DAL) wantaim 10-pela fama i mekim dispela wokabout long kisim long soim ol yet na opim maket bilong ol baia bilong ol.

Oi i amamas long serim tingting na save bilong ol wantaim ol arapela fama na didiman na meri.

Isten Hailans provin-sel fud krop opisa, Daisy Kiniafa, i tok ol meri i no kisim planti samting tasol i painim olsem i gat bikpela laik long plaua.

Em i tok ol meri i amamas

kain laik i stap long plaua na ol i painim hat long putim prais long plaua bilong ol.

"Mipela i painim olsem i gat laik bilong plaua long siti. Liklik plaua em mipela i kisim i kam em ol manmeri i baim pinis na mipela i kisim planti askim long nupela oda we mipela bai wok long ol taim mipela i go bek," Mis Kiniafa i tok.

Em i tok ol wokmanmeri bilong Saina Embasi i namel long ol arapela lain husat i soim bikpela laik long plaua bilong ol.

Em i tok stat long dispela taim i go ol i amamas long luksave i gat long grup bilong ol na ol bai mekim olgeta samting long strongim grup.

Arere long wok bilong kamapim na lukautim plaua, ol meri i kisim askim long strongim wok long wok bilong laipstok, rais, kopi na ol arapela wok didiman.



LAIKIM: Plaua i wanpela bisnis na i ken kamapim mani olsem long pote we ol meri Goroka i mekim long dispela mun long plaua so long Mosbi.

## Moa toksave mas stap long pait agensim hevi bilong sot bilong kaikai

Busisi Siwaka (DAL) i raitim

GAVMAN i kisim askim long kamapim moa toksave long hevi bilong sot bilong kaikai.

Na olsem em i mas mekm olgeta samting long pait agensim dispela hevi.

Oi fama, ol maket lain, ol wokmanmeri na olgeta arapela manmeri i mekim dispela singaut long taim ol i tingim de bilong makim Wol Fud De long Mosbi i no long-taim i go pinis.

Het tok bilong dispela yia em "Bung wantaim yumi ken pait agensim hangre."

Long Mosbi ol wokmanmeri bilong Dipatmen bilong Agrikalsa na Laipstok (DAL), Nesanel Kapitel Distrik Komisen, ol arapela gavman ejensi, non-gavman oganaisesen na fama grup i kamap long tingim de.

Oi i mekim wokabout i go tu long ol maket ples olsem Gordons, Hohola, Koki na ol arapela maket long siti.

Long dispela taim tu ol wod kaunsil long namba wan taim i join wantaim ol gavman opisa na kempein long strongim kamap na wok bilong kaikai.

Inap olsem 100 manmeri i kamap long dispela taim na wokabout.

Ripot bilong Yunaited Nesens i tok inap olsem wan bilion manmeri i stap wantaim hangre long dispela taim.

Oi oganaisa i toktok long dispela het tok long wanem namba bilong ol hangre i stap long 850 milion na nau i go antap long wan bilion long 2009 bihain long prais bilong ol kaikai i go antap stat long 2008.

As bilong ol oganaisa i kamapim Wol Fud De em bilong mekim wanwan ol komyuniti na kantri i save long kain hevi ol manmeri na pikinini i bungim long taim bilong hangre.

Dispela pasin i kamap bilong strongim tu tingting bilong ol manmeri long ol i mas skruim yet dispela ol toktok long pait agensim hevi bilong hangre.

Fud na Agrikalsa Oganaisesen

(FAO) i kamapim inap olsem wan (1) billion hangre projek we i lukluk tokaut long wol long pasim o daunim dispela hevi bilong hangre.

Projek em ol i kamapim bilong askim ol lidaman long wol long ol i mas mekim toktok bilong hangre i namba wan samting bilong toktok.

Bikos PNG i memba bilong wol komyuniti, em i mas kamapim ol samting bilong bihainim dispela askim.

LongMosbi ol grup i go long planti maket long Mosbi na tokaut long dispela hevi na ol tingting bilong pait agensim em.

Gustave Ivarature, 31, husat i stap long Gerehu, i tok planti manmeri long dispela taim i wok long painim hevi bilong kaikai.

Planti manmeri, mani i sot na prais bilong ol kaikai i go antap.

Oi graun tu i sot long manmeri i mekim gaden long kisim kaikai long em.

Bihain long wokabout, olgeta manmeri i bung long Ela Bis na givim toktok bilong ol.

Regina Nukundi, DAL tim lida na sif laipstok opisa i tok tenkyu long olgeta lainmanmeri husat i kamap long tingim dispela de na givim ol toktok.

Kila Dick, NCDC Sosel Sevises Menesa i tok WFD i bikpela samting long wanem em i mekim ol manmeri i tingim bek wanem samting em i kaikai.

Em i tok dispela i ples klia long planti hap bilong siti we ol i ken lukim ol manmeri i hangre na askim i go kam long kaikai.

Hohola Wod Kaunsila, na Not Wes Kaunsil Presiden Max Manale i amamas na tok tenkyu long DAL na NCDC long ol i askim ol kaunsila long kamap long WFD progrem tu.

Em i tok kamapim kain wokbung long pait agensim kain hevi bilong kaikai i ken kamapim sampela gutpela mak bilong helpim ol manmeri.

De PNG i makim i go wantaim long Wol Rurel Wimen De na Intanesenel Povati De we ol i kamap long 15 na 17 Oktoba.



NOTIS I GO LONG OL SAPLAIA BLONG OL GUDS NA SEVIS I GO LONG GAVMAN DIPATMEN PROVINSOL NA LOKOL LEVEL GAVMAN

### 2010 PASIM BLONG OL AKAUNTS

TOKSAVE LONG ARERE BILONG 2010 FAINENSOL YIA I GO LONG PABLIK OLSEM:

- Laspela dei long givim aut ol nupela Integrated Local Purchase Order Claim (ILPOCs), na tok orait long commitment i go long Gavman PGAS em long deit **13th DISEMBA 2010**. Bai nogat nupela ILPOC bai go aut bihain long dispela dei, **13 DISEMBA 2010**.
- Peimen bilong ol guds na seves i go long husat i givim ol samting long Gavman, yusim ol trupela ILPOC bai go yet inap **31st DISEMBA, 2010**.
- Gavman bai baim husat saplaia sapos yu givim ol inouis bilong yu i go inap arere blong bisnis long dei **10th DISEMBA 2010**. Sapos yu givim ol guds na seves pastaim long **10th DISEMBA 2010**, yu bai ol baim yu long 2010 yia.
- Olgeta inouis na wanem kain askim yu gat imas go long pei opis bilong wanem gavman dipatmen husat i bin yusim guds na seves blong yu. Noken karim ol kleims bilong yu i go long dipatmen bilong Fainens.
- Toksave ken olsem Gavman bai baim tasol ol opisil ILPOC na i no ol narapela kain kleim. Dispela em i Lo.

Authorised by:  
**GABRIEL YER**  
SECRETARY BLONG FAINENS






**GUTPELA PILAI:** Gorethy Semi (namel) bilong SP Brewery i amamasim PNG ragbi sevens tim long ol i winim bol trofi long Komonwelt Gems long India na tu long gutpela pilai bilong ol long Australia dispela yia. SP i amamasim tim long wanpela bung bilong ol las wik



**AIN MANGI:** Michael Malai Kipman husat i save stap long Wewak i soim medol em i winim long ainman resis bi long ol liklik mangi las wik long Wewak.

**RESIS LONG BAL:** Wanpela Hekari United pilai i traिम long kam hariap na kisim bal long birua bilong em bilong Amical FC bilong Vanuatu long namba wan O' Lig pilai bilong ol dispela yia long Mosbi. Amical i win 2-1. *POTO: Nicky Bernard.*



## Spots Dro

National Soccer League  
Raun 1.  
Sarere Oktoba 30, 2010.

3:00	PRL	Hekari Utd FC	vs	Gigira Laitepo Morobe FC
3:00	LO	Madang Fox FC	vs	Besta PNG Utd FC
3:00	IKS	Tukoko University Lae FC	vs	Petro Souths FC

Bai: Eastem Stars FC.

Pot Mosbi Meri Sofbol  
Sarere Oktoba 30, 2010

<b>Daimon 3</b>				
08:00	B	Brown Eagles	vs	Tikina
09:15	U16	Stingerz	vs	United Sisters
10:30	U16	Wantoks	vs	Gazelle
11:45	B	Stingerz	vs	Bears
01.00	B	Wantoks	vs	United Sisters
2.15	A	Dolphins	vs	Bears
3.30	A	Stingerz	vs	United Sisters
<b>Daimon 2</b>				
09:15	U16	Bears	vs	Dolphins
10:30	U16	Admiralty Mariners	vs	Chebu
11:45	B	Admiralty Mariners	vs	Dolphins
1:00	B	Gazelle	vs	Chebu
2:15	A	Admiralty Mariners	vs	Chebu
3:30	A	Gazelle	vs	Wantoks

NGCB 2010 PNG Media Pool Competition  
Sarere Oktoba 30, 2010.  
Gren fainols de.

10:00	- Lamana Plate Final		
	Telikom Rait Pre Paid	vs	MRDC NauFM
11:00	- NGCB Cup 3 <sup>rd</sup> spot play-off		
	Eye Magine Cuestars	vs	Cool Grafix Originals
2:00	- NGCB Cup Grand Final		
	Lamana Media Council	vs	NGCB Niusmakers



**SOIM KALA:** Ol model i soim ol nupela yunifom bilong ol tim husat bai stap insait long Nesanel Soka Lig (NSL) resis dispela yia. Namba wan gem bilong NSL dispela yia bai stat dispela Sarere. *POTO: Nicky Bernard.*

**TOKSAVE:** Salim ol spots dro bilong yu kam long Feks; 325 2579,  
e-mel; [amoln@wantok.com.pg](mailto:amoln@wantok.com.pg) o kam lusim long  
Wantok Niuspepa opis long Central Waigani, NCD.



## 4 NESENS DRO

**Gem 1, Oktoba 23 - Westpac Stadium, Wellington, New Zealand**  
New Zealand 24 - England 10

**Gem 2, Oktoba 24 - Parramatta Stadium, Parramatta, Australia**  
Australia 42 - Papua New Guinea 0

**Gem 3, Oktoba 30 - International Stadium, Rotorua, New Zealand**  
New Zealand - Papua New Guinea

**Gem 4, Oktoba 31 - AAMI Park, Melbourne, Australia**  
Australia - England

**Gem 5, Novemba 6 - Eden Park, Auckland, New Zealand**  
Papua New Guinea - England

**Gem 6, Novemba 6 - Eden Park, Auckland, New Zealand**  
New Zealand - Australia

## 4 NESENS POIN LEDA

Tim	P	W	D	L	F	A	PTS
Australia	1	1	0	0	42	0	2
New Zealand	1	1	0	0	24	10	2
England	1	0	0	1	10	24	0
Papua New Guinea	1	0	0	1	0	42	0

# Kumuls no givap

Andrew Molen i raitim

42 – 0 em i wanpela bikpela skoa tru we Papua Niugini Kumuls i lus long en las wik Sande agensim Australia tasol ol i luksave long planti samting tu long dispela gem.

Wanpela bikpela samting em banis bilong ol Kumuls we i sanap strong tru, na sapos ol i bin lukaut gut, em Australia bai no i nap putim tupela trai we i kamap long asua bilong ol Kumuls yet.

Long wanpela bilong dispela ol trai, Kumuls fulbek, Ryan Tongia i kikim bal i kam bek insait long fil bai em i noken go utsait tasol em i no lukim Cooper Cronk i kam long baksait, husat i kisim na skoa.

Wankain asua i kamap gen taim Kumul winga, Elijah Riyong i abrus long holim bal i kam long wanpela kik na Kangaroo senta, Brent Tate i kisim na skoa.

Narapela samting ol Kumuls i ken luksave long en tu em, ol i no givap.

Dispela em bikpela samting we nogat planti Kumuls tim long bipo i save soim.

Ol i pilai wantaim wankain strong na long stat bilong gem i go long pinis na kamapim tu ol bikpela takol we i givim planti pen long ol Australia.

Strongpela gem bilong ol i lukim Australia i putim tupela trai tasol long namba tu hap bilong gem.

Kumul kosa, Stanley Gene i tok long ol nius ripot dispela wik olsem em i lukim planti gupela samting



STAP YET: Kumuls bai bungim Kiwis dispela Sarere.

insait long gem bilong ol long las wik we ol i ken wok long en long pilai gut moa long ol arapela gem i stap yet.

Bikpela amamas bilong Gene em long strongpela banis bilong ol, maski Australia i putim 42 points.

Dispela ol trai no kamap isi, Australia i traim hat tru bipo ol i kisim ol dispela poin.

“Ol mangi givim 100 pesen bilong

ol stret long Sande na mi ting ol Australia pilai mas pilim pen yet long sampela bikpela takol ol i kisim,” Gene i tok long AAP nius ripot dispela wik.

Dispela Sarere bai ol i bungim New Zealand long Rotorua long New Zealand yet.

NZ i winim England las wik, 24 – 10 na Kumuls bai gat narapela bikpela salens gen.

# Lockyer mekim rekot agensim PNG

DARREN Lockyer i brukim wanpela moa rekot bilong Australia taim em i putim namba 34 trai bilong em long Intanesenel level.

Trai bilong Lockyer em i wanpela bilong 8-pela trai ol Kangaroos i putim agensim Papua Niugini Kumuls long 42 – 0 win bilong ol long Parramatta stadium las wik Sande long namba wan gem bilong ol insait long 4 Nesens salens dispela yia.

Lockyer i brukim rekot bilong bipo Kangaroo pilai, Ken Irvine we i sanap inap 42 yia olgeta.

Irvine husat i save pilai olsem winga i bin putim 33 trai na rekot bilong em i sanap long 1968 yet inap Lockyer husat i holim rekot olsem man i pilaim moa gem bilong Kangaroos na tu olsem man husat i stap kepten longpela taim moa, i brukim las wik.

Trai bilong Lockyer i kamap long 59 minit bilong gem we PNG no bin inap long bekim wanpela trai.

“Em i wanpela spesol samting long brukim dispela rekot,” Lockyer i tok.

“Mi laki long pilai bilong Australia longpela taim we mi lukim na kisim planti samting olsem na long kisim dispela rekot tu em i wanpela bikpela samting we mi bai tingim na amamas long en olgeta taim,” em i tok.



TRAI: Lockyer i brukim rekot bilong Irvine we i sanap 42 yia olgeta.



# Tenis go kamap long Moro

TENIS i go kamap long Moro long Sauten Hailans provins long stat bilong dispela mun.

Em i namba wan taim tru bilong dispela spot i go kamap long hap na i olsem wanpela nupela spot long ol manmeri long hap.

PNG Tennis Association wantaim sapat bilong BSP benk i kisim dispela program i go long Moro long Oktoba 4 i go long 7 dispela yia.

Nesanel tenis kosa bilong PNG, Kwalum Apisah i go kamap long hap long Oktoba 4 na i bung wantaim Tim Lida Operesens bilong BSP long Moro, Meck Kaum na narapela BSP opisa, Obaha Veao na ol i statim wok long skulim ol manmeri long tenis.

Ol i bung wantaim prinsipol bilong Kutubu Hai skul, Norbert Sendip na long Oktoba 5, ol i go bek na statim wok bilong ol long hap.

Moa long 100 Gred 9 sumatin i kamap long dispela de long lainim tenis.

Olgeta i soim laik long lainim dispela

spot bilong wanem planti bilong ol i no save long dispela spot.

Bihain ol i go long Kutubu praimer skul we 60 sumatin long hap i bungim ol long lainim pilai.

Taim ol i kisim sampela skul long tenis pinis, ol i go insait long wanwan grup na pilai wanwan gem bilong ol yet.

Kaum na Veao i tok nois bilong ol sumatin i soim amamas bilong ol long pilai dispela nupela gem.

Sampela gred 9 sumatin i kam bung wantaim ol na ol i pilai go inap avinun.

Inap olsem 227 sumatin na 7-pela tisa i stap insait long dispela program taim em i kamap long Moro.

Olgeta i soim bikpela laik na amamas long lainim dispela nupela spot.

Dispela tenis program i stat long 2009 na i raun planti hap long kantri pinis na dispela yia em i lusim nambis na i go antap long Hailens.

BSP i tok ol i amamas long lukim nupela spot olsem tenis i go long kain longwe ples olsem Moro.



HARIM TOK: Ol sumatin long Moro i kisim skul long pilai tenis. POTO: BSP

## Bikpela yia bilong PNG soka

...I kam long baksait pes.

Andrew Molen i raitim

DISPELA sisen bai bikpela yia bilong Nesanel Soka Lig (NSL) na tu soka insait long Papua Niguini.

Planti moa salens na strongpela resis bai kamap insait long NSL na tu O'lig na long wankain taim bai PNG salim wanpela tim i go long Wol klap salens long Dubai, namba wan taim tru.

Dispela em lukluk na promis bi-

long siaman bilong NSL, John Kappi Natto.

Em i bung wantaim ol memba bilong PNG Football Association (PNGFA) na Sif Eksekutiv Opisa (CEO) bilong Telikom, Peter Loko dispela wik Trinde long tokaut long stat bilong NSL sisen.

Namba wan gem bai stat dispela Sarere na Telikom PNG bai stap yet olsem mama sponsa.

Kappi Natto i tok soka long PNG i wok long kamap strong olgeta yia na dispela sisen bai em i go strong

moa yet.

"Hekari United bai pait long kisim bek O'lig taitol bilong ol na long wankain taim bai ol i makim PNG long Wol Klap salens long Dubai long Disemba.

"Dispela em i namba wan taim tru bilong wanpela klap bilong PNG long go pilai long dispela level na em i bikpela samting long yumi," Kappi Natto i tok.

Loko i tok ol i amamas long sapatim NSL gen na tu i strong Hekari long mekim gut.

"Kolstu olsem K10 milien manmeri long PNG na Pasifik i stap long baksait bilong Hekari taim ol i go long dispela bikpela pilai," em i tok.

Tasol em i tok dispela pilai na win bilong Hekari em i no bilong PNG tasol, em i bilong Pasifik tu.

"I gat sampela ol pilai bilong ol arapela Pasifik kantri pilai insait long ol tim bilong yumi olsem na dispela win em i bilong PNG na Pasifik tu," Loko i tok.

Kappi Natto i tok tu olsem NSL

resis bai strong dispela yia bilong wanem ol bai lukluk tu long makim wanpela tim bilong makim PNG long Pasifik Gems long Niu Kaledonia long 2011.

"Olsem na mipela i bilip ol pilai bai pait strong long winim ples insait long dispela skwat," Kappi Natto i tok.

7-pela tim bai resis long NSL dispela yia, namel long ol em wanpela nupela tim i kam long Sauten Hailans ol i kolim; Petro Souths FC.

## Kumul waswas



WASWAS: Mangi Hailans, Kumul winga, Michael Mark i traिम ron antap long solwara wantaim wanpela liklik raba kanu long Bondi nambis long Sydney las wik Fraide taim ol Kumuls i go malolo bihain long trening. Dispela Sarere bai ol i pilaim New Zealand long Rotorua. POTO: AAP Images.



**SPOT RAUN**  
WANTAIM  
Scott Vavine, ML



## Taim bilong kisim ol gutpela pilai graun na trening ples

PLANTI bikpela Intanesenel i kamap pinis bipo na bihain long independens bilong Papua Niugini tasol kantri nogat wanpela gutpela spots pilai graun o ples na ol samting bilong trening yet.

Mi sore long lukim olsem ol arapela kantri insait long Pasifik i wok long go pas long yumi wantaim sampela ol gutpela samting bilong spots we inap long helpim ol i redi long ol nupela kain stail bilong trening na pilai na apim level bilong ol.

Kantri bilong yumi nogat dispela kain ol samting i stap tasol yumi save salim ol Tim na pilaia bilong yumi go ovasis long pilai.

Dispela i go long olgeta spots na gem insait long kantri.

Wanpela askim yu ken mekim em; "Bilong wanem na yumi mas i gat dispela ol samting?"

Gutpela bekim bilong dispela askim em; yumi mas i gat dispela kain ol pilai graun na ol ples na samting bilong trening bai ol etlit bilong yumi ken yusim long strongim ol yet na givim ol moa save na strong long pilai gut moa long Intanesenel level.

Tasol taim yumi gat dispela ol samting, yumi mas i gat gutpela wok long lukautim na ronim ol gut bai ol i stap long taim.

Long mekim dispela wok lukautim i kamap gut, i mas i gat inap mani go long mekim em i kamap.

Tasol husat bai givim dispela mani long mekim dispela wok?

Na husat bai go pas long mekim dispela wok long lukautim ol dispela samting bilong pilai na trening?

Dispela em sampela ol samting yumi mas tingim tu.

Tasol tingting bilong kamapim dispela kain ol pilai graun na trening ples we inap long Intanesenel level, i mas stap long het bilong ol politisen na ol kopret sponsa tu.

Dispela ol lain i gat planti bikpela risos na i ken helpim long mekim kain ol samting i kamap.

Tupela bikpela pilai graun na trening ples bilong 1991 Saut Pasifik Gems long Lae na Mosbi, i lapun nau na i wok long bagarap na bruk wanwan bilong wanem i nogat mani long lukautim ol.

Dispela tupela pilai graun i klostu long mak bilong intanesenel level taim ol i nupela yet.

Nau yumi lukluk long ragbi lig olsem wanpela piksa.

Dispela PRL pilai graun long Mosbi em ol i mekim long 1950's na nau ol inap long brukim na mekim gen i kamap olsem ol pilai graun long Australia.

Nau i gat semi-profesenel gem olsem bemobile kap tasol dispela pilai graun i stap wankain yet.

I gat planti politisen na ol kopret bisnis haus i save sapotim dispela bikpela gem tasol long kamapim kain bikpela pilai graun em ol i mas putim planti milien kina long kamapim.

Mi ting dispela em gutpela invesmen long sait bilong spots na komyuniti tu sapos ol i putim kain mani long mekim.

Ol bai givim planti gutpela samting i go long komyuniti sapos ol i kamapim wanpela kain projek olsem.

Sampela bilong ol dispela samting em tingting bilong amamas, ol bai mekim ples we bai lukim planti moa ol gutpela yangpela pilaia i kamap long en, wanwan provins i ken i gat luksave long en, hevi bilong lo na oda bai go daun na planti arapela.

Sapos wanwan provins i gat wanpela intanesenel level stadium bilong ol yet, bai olgeta i bung wantaim na planti gutpela pasin na tingting i ken kamap long en tu.

Dispela em i stap nau long wanwan provins na ol politisen bilong ol long go pas long lukluk long en na kamapim kain samting olsem bilong yumi olgeta.

# Ain man resis bilong ol mangi

MAL Naman bilong ples Meni em liklik ainman o ain mangi bilong Wewak taun bihain long em i winim traiatlon resis bilong ol long hap las wik Sande.

Naman i win long divisen bilong em bilong ol mangi gat krismas namel long 7 na 8.

Long pinis bilong resis, em i ron 600 mita i kam long win na i no pulim win long taim bipo em i tanim i go bek long sekhan long ol arapela husat i kam baksait long em.

Bona Narakobi win long 9 i go 11 krismas divisen na Michael Bunbun bilong Meni tu i win long grup bilong em.

Naman i stap insait long resis wantaim moa long 100 mangi insait long dispela resis we Sanitarium i go pas long en, long Meni nambis.

Sanitarium i givim ol tu siot wantaim hap tok; "I learn I train, I try, I am a Champion," (Mi lainim, mi trening, mi traime, mi em sempion) i pas antap long en.

Ol i resis insait long tripela divisen, ol mangi wantaim krismas namel long 7 na 8 (600m), 9 i go 11 krismas (1.4km) na 12 i go 15 krismas (2.5km).

Dispela em i namba wan taim tru bilong traiel resis bilong ol mangi kamap long Is Sepik provins na tu Meni nambis long Wewak.

Sepik Ironman Competition komiti, aninit long siaman, Wally Tawia, namba tu bilong em, Gilbert Sari wantaim Ken Micah na Cynthia Power na ol arapela memba i go pas long en.

Mausman, Sari tok dispela resis em i olsem traiel tasol wantaim sapot bilong Sanitarium.

"Mipela i kamapim dispela resis long lukim laik bilong ol mangi long resis na long dispela bai mipela i salim ripot i go bek long sponsa long helpim moa bihain taim," em i tok.

Sepik Ironman komiti ken amamas long dispela resis bilong wanem planti manmeri tru i kamap long lukim.

Plantim em ol liklik mangi husat i kam wantaim ol papa mama na ol haus lain bilong ol husat i sapotim ol long pilai.

Sari tok ol i bin tingting long rejistaim 100 pilaia tasol long dispela traiel resis tasol i bin gat planti moa i laik



**MEDOL: Michael Malai Kipma, 7 krismas, i sanap sait long siaman bilong ogenaising komiti, Wally Tawia na soim medol bilong em.**

resis na mekim ol i abrusim dispela mak.

Em i tok wankain pilai olsem i bin kamap long Australia na Nu Silan (New Zealand) na Is Sepik em i namba tri provins insait long Papua Niugini long kamapim dispela resis.

Em i bin kamap pas long Manus na Otonomes Rijen bilong Bogenvil.

Plantim ol mama papa husat i kamap long resis i amamas long komiti mekim dispela.

Wanpela papa i laik bai dispela i kamap olgeta yia na narapela i tok em i gutpela rot long statim ol liklik mangi long bihainim.

"Dispela kain samting i ken stopim ol liklik mangi long noken go insait long ol bikhet pasin insait long komyuniti olsem spak na kisim drak," dispela papa i tok.

Olgeta mangi husat i stap long dispela resis i kisim medol.

Sari tok dispela em i traiel resis olsem na bai nogat wanpela i kisim prais bilong kam namba wan, tu o tri tasol i tok ol i mas amamas bilong wanem dispela i wanpela Intanesenel resis na ol i ken amamas olsem ol i stap insait long en.

## Meri sevens tim go salensim Esia

PAPUA Niugini ragbi sevens tim bai traime bun wantaim ol arapela tim bilong Esia na Pasifik taim ol i stap insait long Asia Pacific Women's Sevens tonamen dispela Fraide, Oktoba 29.

Olgeta pilai bai pinis long Sarere, Oktoba 30 na bai kamap long Malaysia ol arapela Pasifik kantri ol PNG meri bai bungim em Samoa, Tonga na Cook Ailans.

Dispela tim i gat strongpela tingting long mekim gut olsem PNG sevens tim bilong ol man we i kam namba 4 ples long Darwin na i winim bol trofi long Komonwelt Gems long Delhi, dispela mun tasol.

Asia Rugby Football Union (ARFU) i kamapim dispela tonamen na i salim tok long PNG go pilai bilong wanem ol i stap insait long Federation of Oceania Rugby Union (FORU), wantaim Samoa, Tonga na Cook Ailans tu.

Ol kantri bilong Esia husat bai pilai long dispela tonamen em India,



**SEVENS SALENS: Meri sevens tim i laik mekim gut. FOTO: PNGRFU.**

Kazakhstan, Singapore na Malaysia yet.

PNG Rugby Football Union (PNGRFU) i makim dispela PNG tim bihain long wanpela nesanel klap sempionsip bilong ol meri we i kamap long Mosbi long Septemba 16 dispela yia.

Olgeta pilaia long dispela skwat i kam long Mosbi bilong wanem i nogat ragbi union pilai bilong ol meri long ol arapela provins.

Tim em; Debbie Kaore, Geua Larry,

Dulcie Bomai, Margaret Naua, Yarowena Morofa, Joan Wari, Susan Kararau, Cassandra Sampson, Ethel Kanana, Patricia Torea, Cathy Neap na Lyneth Henry, John Larry (kosa), Cecil Davani (asisten kosa) na Esther Nombri (tim menesa).

Dispela tonamen bai givim sans long PNGRFU long bihainim astingting bilong em long givim moa luksave long ol yangpela na sinia pilaia bilong ol meri na man wantaim long kain ol intanesenel tonamen olsem.





# SPOOTS



Isu 1889

Wan wik: Fonde, Oktoba 28 - Novemba 3, 2010.

# Bikpela yia

## NSL na PNG soka bai gat moa salens



PUTIM AI: Cyril Muta (lephan) bilong Hekari na Adrian Komu bilong Eastern Stars i putim ai long Telikom kap trofi we ol bai resis long en gen dispela yia insait long Telikom NSL resis. Gem bai stat dispela Sarere.

Stori long PES 26.

POTO: ANDREW MOLEN

## NISSAN NAVARA D40

NISSAN SHIFT the way you move



D40 STICK TO FACTS

..Pilim gut, witnessim Powa, experiensim Strong..

- FACT1 - POWERFUL ENGINE**  
Evidens: 2.5 turbo disel engin wantaim 108 kW piwa powa
- FACT2 - MOA SEFTI**  
Evidens: Anti-Lock braking system (ABS), electronic brakeforce distribution (EBD) na brake assist (BA). Driva na pasindia airbags
- FACT3 - COMMANDING PRESENCE**  
Evidens: A robust chassis featuring 16" alloy wheels
- FACT4 - 4X4 SYSTEM**  
Evidens: 3000kg Braked towing capacity

LIMITED STOK! I STAP NAU LONG OLGETA BRENS!

### BOROKO MOTORS

PORT MORESBY PH: 325 5255 | LAE PH: 472 1144 | MT HAGEN PH: 542 1933 | TABUBIL PH: 649 9048  
KIMBE PH: 983 5035 | MADANG PH: 422 2659 | RABAU PH: 982 8193 | GOROKA PH: 532 3552

Email: info@borokomotors.com.pg  
Website: www.boroko-motors.com

